

LAI SAMOELAX PHUK RA

(2Samuel)

1 Davit Mhong Grawng Yum Sawlux

1 Khaix hoik yum Sawlux, Davit deeh hoek khaing pah tix pui Amaliet, nawh ot ka daux veng Zikalat ra ngaix, ² yam hoek ka daux loe ngaix, jhak heue, pui tix kaux khaing tab Sawlux riah kraung ceep tix mai sau phawng tiex ka piang kaing tix, yam hoek nawh ka Davit nawh gup tix piang tiex mai gruxgup ka Davit. ³ Davit chawk nawh ah nin, “Kaoh maix khaing dee mawx?” mai pui an ah nin ka Davit, “Aux hoik to khaing tab pui Isarelix.” ⁴ Davit deeh ah nin ka nawh, “Mawh koe grawng ceu pa yuh ka mawx? Krai aux mhongliak” mai nawh pawk ah nin, “Pui hoik to khaing daux bang naing mai hoik goh ti yum tomnie, Sawlux mai kawn simex nawh Yawnasan kawx hoik yum.” ⁵ Davit deeh ah nin “Maix tawng grawng yum Sawlux mai kawn simex nawh Yawnasan yuh ka mawx?” ⁶ Pui awn ju an krai ah nin, “Yam hoek aux piang gawng Gilabaw daux pa ang tix keud ce, aux yaox hoik sigup Sawlux ka piang pliah cao tix mai cub krunaing linglawx brung pui naing brung khankix niied ti pheet nawh. ⁷ Yam veeh Sawlux ti jhak ka plak khaix tix, nawh yaox aux mai kok ka aux mai aux deeh pawk ah nin, aux ot tin, ⁸ nawh ah nin ka aux, mawh maix pui mawx? aux deeh pawk ah nin, aux mawh pui Amaliet. ⁹ Nawh ah nin ka aux, hoek tin mai pah aux yum, mawh kheu aux kied kharhawm tix, kheu ang aux chix dudrhawm, ¹⁰ mawh kheu nan aux hu ka nawh mai pah nawh yum, kheu hoik kriem tawng aux ang nawh lai pon im ka deegoh tix mai aux hoik peeik mhok khri khaing kaing nawh mai ble pa ceep nawh ka taix tix mai aux hoik viex ankix hoek tin ka cao simiang aux.” ¹¹ Yam an Davit riah kraung ceep tix mai pui pa ot tau mai nawh kawx yuhawman. ¹² Kixyiiemdoe maituah paih

1:6-10 1Sa 31:1-6; 1Ben 10:1-6. **1:18** Yaw 10:13.

tom hoek plak bo, son Sawlux mai son kawn simex nawh Yawnasan mai son pui Siyiex khankix mai son nyiexma pui Isarelix, mawh kheu hoik goh kix ti yum ka lawm vaid khawmuik. ¹³ Davit chawk ka pui awn ju pa hoik krai grawng ceu an ah nin, “Mawh maix pui kaoh khaing dee mawx?” mai nawh deeh pawk ah nin, “Aux mawh kawn simex pui tang ceu pui Amaliet.” ¹⁴ Davit ah nin ka nawh, “Maix ang koe krax lhatgraung sonsang nyeu maix taix ti pah ka pui pa hoik groi Simiang Siyiex rawm bee kah yuh ka mawx?” ¹⁵ Davit kok ka kawn nyawm awn ju tang kaux ah nin, “Hu mai pah nawh yum” mai kawn nyawm awn ju an pah nawh yum. ¹⁶ Mawh kheu nan, Davit ah nin ka nawh, “Kieh nham maix deeh hoek ka piang kaing maix, mawh kheu jheeh maix mawh pa kham mhairug son tokaux maix, kheu ah maix nin, aux hoik pah ka pui pa hoik groi Siyiex rawm bee yum heue.”

Lox Yiiemdoe Davit

¹⁷ Davit yiiemdoe mai ah lox rhax in ka son Sawlux mai ka kawn simex nawh Yawnasan, ¹⁸ Nawh krai sonsang gau pui Yudax ka loxlairhax ah in, lairhax in mawh pa hoik tiiem ti deuh ka daux phuk lai Yasha. ¹⁹ “Pui Isarelix khankix eue, min plakngai maix hoik yum piang dee pa lhaong maix, pui naing pa vaorhawm kawx hoik goh ti yum. ²⁰ Paw krai grawng an ka daux veng Gata, paw krai pao grawng in ka daux krax veng Ashakelon, aux lhat kawn sibun pui Philitix koe krax pa gauxrhawm, phan ang mawh nan, aux lhat kawn sibun pui pa ang nyang pat hak, koe krax pa nyawmrhawm. ²¹ Gawng Gilabaw khankix eue, paw kieh rawm ciex mai rawm lhiex cod piang pex mai paw kieh plix khaox pa sang tan koe ka daux kaung, grawh grawng nawh, plah rhiem pa tiebtie cao pa ting riang rao khankix hoik mawh pa nunai pui kah, pliah rhiem pa

tiebtie cie Sawlux pa kraix bee kawx hoik rhaw." ²² "Ak cie Yawnasan ang lai deeh hoek giex mai lawm vaid cie Sawlux kawx ang mawh pa deeh ing yi khaing nham pui yum mai khaing klon bee pui ting riang rao khankix." ²³ Yam kawn im ju Sawlux mai Yawnasan hoik mawh pa koe krax moh krax rhawm mai pa khawrhawm pui kah mai yam yum kiexkawx, kiex anggoih khaing paox tix, kiex nielheu phai khaing klang krih mai nielheu ting riang khaing sivai sangsi." ²⁴ "Kawn sibun Isarelux khankix eue, yiem grai son Sawlux, pa hoik kieh pex yaox ti ceep kraung pa raoh rawt mai pa mhawm grang mai pa hoik jawg bre kraung khri piang kraung ceep pex." ²⁵ Pui pa kied ting riang rao, hoik goh ti yum, ka daux sigreung bang naing, O! Yawnasan pa yum ka dee pa lhaong pex khankix. ²⁶ Pux aux Yawnasan eue, aux hoik lauxrhawm ka son maix, maix mawh pa tawx krax nyawmrhawm ka aux, krax moh maix mawh pa daoxdeng ka son aux, mawh pa nielheu blon ting khaing krax moh sibun khankix." ²⁷ Pui pa ting riang rao hoik gohti yum mai kraung naing hoik mawh pa somnai heue."

2 Davit Mawh Simiang Meung Yudax

2 Khaix an, Davit chawk ka Simiang Siyiex ah nin, "Mawh sang yaox aux ti haok ka veng pa koe ka daux meung Yudax tix veng veng lie?" mai Simiang Siyiex ah nin ka nawh, "Hu heue," Davit deeh ah nin, "Mawh sang yaox aux ti haok ka veng mawx lie?" Nawh Cao ah nin, "Hu ka veng Hebron." ² Mawh kheu nan Davit haok ka dee an tau mai moeng nawh ra kaux Ahinawm pa mawh sibun veng Yezerelax mai Abigelax pa mawh moeng Nabalax sibun veng Kharamelax. ³ Davit viex pui pa ot mai nawh haok tau mai pui nyiexma kix kukaux mai ot ka daux nyiex yaong veng Hebron khankix. ⁴ Pui Yudax hoek mai kix groi bee piang Davit, sonsang yaox nawh ti mawh simiang piang nyiexma pui Yudax mai kix ah nin ka Davit, "Pui veng Yabiet khaing ka daux haktiex Gilat hoik yaox ti sipaung ka Sawlux." ⁵ Mawh kheu nan, Davit ploicoao cautixhuka pui veng Yabiet pa ot

ka daux haktiex Gilat ah nin ka kix, "Kieh Simiang Siyiex nawb buan piang pex, mawh kheu pex hoik jhi krax cauxrhawm tix ka cao simiang pex Sawlux mai sipaung nawh. ⁶ Kieh Simiang Siyiex deeh jhi krax cauxrhawm Tix mai pa mawhmeh Tix piang pex, mawh kheu hoik yuh pex ceu in, aux tak deeh viied krax cauxrhawm ka pex." ⁷ Mawh kheu nan teei riang pex kieh koe rhawm kauxcong mai rhawm kua rhawm vao, mawh kheu simiang Sawlux hoik yum mai daux nyiexma pui Yudax hoik groi bee piang aux mai hoik yaog aux mawh simiang piang kix."

Yaog Ishabawshiet Mawh Simiang

⁸ Abana kawn simex Nerax cao kaing naing ting Sawlux khankix teei Ishabawshiet kawn simex Sawlux mai viex nawh hu ka veng Mahanem. ⁹ Kix yaog nawh mawh simiang piang pui Gilat, pui Asha, pui Yezerelax, pui Epharim, pui Benjamin, pui Isarelux khawmuik. ¹⁰ Yam koe ju Ishabawshiet kawn simex Sawlux tixpon num, nawh jah ti kuang piang haktiex Isarelux, nawh yaox ti kuang ra num, viang mawh nan, mawh ngie cub doeh nyiexma pui Yudax pa hawt khaix Davit. ¹¹ Yam mawh Davit simiang daux veng Hebron piang doeh nyiexma pui Yudax, koe aliah num mai liah khix.

Naing Isarelux Mai Yudax

¹² Abana kawn simex Nerax mai siliex Ishabawshiet kawn simex Sawlux lih khaing veng Mahanem mai hu ka veng Gibion. ¹³ Yuabax kawn simex Zeruya mai siliex Davit lih hu rieb kix hawt rawm nhawng Gibion mai kix ngawm piang toi rawm nhawng plak in tix cub, plak an tix cub. ¹⁴ Abana ah nin ka Yuabax, "Kieh pui awn ju in khankix yaog ti kaoh mai silah paox tix ka plak sivoe ex" mai Yuabax ah nin, "Kieh kix silah heue." ¹⁵ Mawh kheu nan, kix yaog ti kaoh hu awm pa hoik simin kix khaing pui Benjamin kao ra kaux pa hawt khaix Ishabawshiet kawn simex Sawlux mai khaing pui daux cub siliex Davit kao ra kaux. ¹⁶ Kumawx kuan ralai jhawpkaing paox tix mai blung paw paox tix ka vaid mai goh ti yum tau khawmuik, Mawh kheu nan, dee an tom kok mawh Helaka Hazurim bang lawm vaid, pa koe baoh veng Gibion. ¹⁷ Daux singaix an, naing hoik kied kin tete, Abana khawm

pui Isarelaux hoik som ka plak sivoie siliex Davit.¹⁸ Kawn simex Zeruya loe kaux pa mawh Yuabax, Abishie mai Asahelax ot tan khawmuik, Asahelax mawh pa kied phai caongawm cak.¹⁹ Asahelax niied ti hawt khaix Abana mai nawh ang lai veeh tix plak goix plak dawm ka hawt tix Abana.²⁰ Abana deeh gi plak khaix tix ah nin, "Mawh maix Asahelax lie?" mai nawh deeh pawk ah nin, "Mawh aux heue."²¹ Abana deeh ah nin ka nawh, "Veeh maix hu plak goix phan ang mawh nan plak dawm mai giex mai naing tix kaux mai teei kraung naing nawh son maix," viang mawh nan, Asahelax ang cu ti veeh khaing hawt tix khaix nawh.²² Abana baoux ah nin ka Asahelax, "Veeh maix hu tangdah khaing hawt tix khaix aux, aux sang chix pah maix yum piang tiex kheu grawng ceu patix? Mai aux sang pon jhi ngai tix ka puxke maix Yuabax yuh ka mawx?"²³ Asahelax ang cu ti veeh tix plak khaix, mawh kheu nan Abana blung vaig nawh ka pliah tix mai pliah an phlat ka blawg nawh mai nawh goh ti yum tan, yam hoek pui hun dee goh Asahelax ti yum, kix cung ka praok nawh tan.²⁴ Yuabax mai Abishie kawx, pheet khaix Abana, singaix klip ka kiex yam hoek kiex ka gawng Ama pa koe sivoie veng Gi-a ka daux krax hu daux tiag Gibion.²⁵ Pui Benyamin khawm paoux tix tau mai Abana mai hoik deeh mawh cub krunaung tix cub mai kix teei dee ot tix piang choek gawng tix mu.²⁶ Abana kokyo ka Yuabax ah nin, "Mawh sangkieh lawm vaid kiied ti ih ex jheengiheeng lie? Mawh ang maix tawng sang mawh ceu in pa song daux bawgyam dee sidah praix sax lie? Mawh kawn sang rheeng miexgrheeng pa tak sang kieh maix pui hun deeh blak ti ing khaing pa hawt pheet tix khaix puxaik kix lie?"²⁷ Mai Yuabax deeh pawk ah nin, "Awm im ju Siyiex, phan maix ang deeh krai lox in, pui khawmuik tak naox pa hawt pheet puxaik tix yam bah rieng praix ponngawb tete."²⁸ Yuabax phlu teettawng mai pui khankix kaog mai kix ang lai hawt pheet pui Isarelaux, kix ang lai yuh naing.²⁹ Abana mai pui nawh lih hu ka

3:10 1Sa 15:28.

daux lung leeing sawm mai kix tiang rawm klawng Yawdan mai hoek ka veng Mahanem.³⁰ Yuabax deeh blak ti khaing hawt pheet tix Abana, yam deeh khawm nawh pui tix khankix, kix yaoux grai cub siliex Davit kao dimkaux khawm Asahelax.³¹ Siliex Davit pon ti pah pui Benyamin khawm pui Abana mai kix yum loe yieh tixgliah kaux.³² Kix teei tokaux yum Asahelax mai sipaung ka daux simeeig keeing nawh ka veng Bieliehiem, Yuabax mai pui nawh hu krax leeing sawm mai hoek ka veng Hebron yam jah praix ti riengheue.

3 Daux sinax paoux nyiex Sawlux mai paoux nyiex Davit koe naing tom rheeng, Davit nie ting riang khaing kix, paoux nyiex Sawlux niied ti iakriang.

Grawng Kawn Simex Davit (1Been 3:1-4)

²Kawn simex pa hoik keh ka son Davit ka daux veng Hebron, kawn Ai nawh mawh Amanon pa keh khaing Ahinawm kawn sibun pui veng Yezerelax,³ Kawn Nyi nawh mawh Khilat pa keh khaing Abigelax, pa mawh moeng Nabalax pui veng Kharamelax mai kawn Sam nawh mawh Abasalom pa keh khaing Makha, kawn sibun Talamie pa mawh simiang haktiex Geshurix,⁴ kawn Sai nawh mawh Adoniyax pa keh khaing Hagit mai kawn Ngox nawh mawh Shephatix pa keh khaing Abitalax,⁵ kawn Log nawh mawh Itaram pa keh khaing Egalax, inkix mawh pa keh ka son Davit daux veng Hebron heue.

Abana Deeh Neuex Mai Davit

⁶ Yam kawn koe naing daux sinax paoux nyiex Sawlux mai paoux nyiex Davit, Abana kieh krunaung tix kauxcong ka plak paoux nyiex Sawlux.⁷ Ishabawshiet ah nin ka Abana, "Kheu maix lai laig it tau mai moeng iak keeing aux pa kaux Rizapa kawn sibun E-a?"⁸ Abana kied songrhawm ka lox krai Ishabawshiet mai deeh ah nin, "Mawh aux kaing sox pui Yudax lie? aux hoik jhi krax pa kaux sijax tix ka paoux nyiex keeing maix Sawlux mai ka puxaik nawh mai ka paouxgrawm nawh, tom in singaix mai aux ang ap kix ka Davit, daux in singaix, maix hoik deuh phimap ka aux grawng sibun in?"⁹ Phan auxangyuh ceu an

son Davit awm pa hoik tiextu Simiang Siyiex ka nawh, kieh Siyiex yuh ceu pa nie kin piang Abana. ¹⁰ Tak tei meung haktiex khaing paox nyiex Sawlux mai deeh pang ti deuh danggeung Davit piang haktiex Isarelaux mai haktiex Yudax, jah ka veng Dan, tom hoek ka veng Berashebax.” ¹¹ Ishabawshiet ang lai pawk lox Abana, kheu hoik kied lhat tix. ¹² Khaix an Abana ploi cao cau hu ka Davit mai kieh kix ah nin, “Cao simiang haktiex in mawh pui mawx?” mai baox ah nin, “Yuh sijax mukheu maix tau mai aux, jhak heue, riang rao plawng taix aux tak ot plak maix mai aux tak viex pui Isarelaux hoek ka maix khawmuik.” ¹³ Davit ah nin, “Mhawm heue, aux tak yuh sijax mukheu tau mai maix, viang mawh nan aux sang mhaing tix ceu ka maix, yam hoek maix ti yaox pakngai aux, phan maix ang viex Mikhalax kawn sibun Sawlux hoek, maix tak ang pon ti yaox pakngai aux.” ¹⁴ Mawh kheu nan, Davit ploi pui cau tix hu ka Ishabawshiet kawn simex Sawlux ah nin, “Deeh tawx moeng aux Mikhalax ka aux pa hoik loh aux ka haktiex pui Philitix tixyieh kaux. ¹⁵ Ishabawshiet ploi pui hu tei Mikhalax khaing mex nawh Palatix kawn simex Lesha. ¹⁶ Mex nawh hawt yiem khaix nawh tom hoek ka veng Bahurim, Abana ah nin ka nawh, “Deeh ing heue” mai nawh deeh ing. ¹⁷ Abana kum mai kuad riex jux pui Isarelaux ah nin, “Bawgyam pa hoik luan, pex sawg ti yaog Davit mawh simiang piang pex. ¹⁸ Yam in yaog heue, Simiang Siyiex hoik sikah ka Davit ah nin, ka dauw tawm taix siliex Aux Davit, Aux tak taoh ceu pui Aux pa mawh pui Isarelaux khaing dauw tawm taix pui Philitix mai khaing dauw tawm taix pui koeng kix khawmuik.” ¹⁹ Abana krai pui Benyamin mhong grawng ceu an mhawm mhawm, khaix an Abana deeh krai Davit mhong grawng ceu pa lo pui Isarelaux mai ka son paox nyiex pui Benyamin ka dauw veng Hebron. ²⁰ Mawh kheu nan, Abana mai pui nawh tixnga kaux hoek ka Davit dauw veng Hebron, Davit yuh pawie khankheu pa ting, ka son Abana mai pui nawh khankix. ²¹ Abana ah nin ka Davit, “Aux sang deeh ing khrawm

3:14 1Sa 18:27.

pui Isarelaux son cao simiang aux, sonsang yuh kix sijax mukheu tau mai maix, sonsang pon maix ti kuang piang kix, awm pa koe rhawm maix,” mawh kheu nan, Davit deeh ploi Abana ing mai nawh deeh yaog ti ing dauw pa nhim.

Grawng Pah Yuabax Ka Abana

²² Yam an, siliex Davit mai Yuabax hoek khaing hawt tix pui koeng mai viex kraung papon tudrhim kix deeh hoek, viang mawh nan, Abana ang lai cau ti ot tau mai Davit dauw veng Hebron, mawh kheu Davit hoik ploi nawh ing mai nawh ing ka dauw pa nhim. ²³ Yam deeh hoek Yuabax mai pui naing nawh khankix, kix krai grawng ceu an ka Yuabax ah nin, “Abana kawn simex Nerax hoik hoek ka simiang mai simiang deeh ploi nawh ing mai nawh ing ka dauw pa nhim.” ²⁴ Khaix an, Yuabax hoek ka simiang ah nin, “Mawh yuh ka mawx? Jhak heue, Abana hoik hoek ka maix jao patix? Maix hoik deeh ploi nawh ing mai nawh hoik pon glawd khaing taix ex. ²⁵ Maix khaw ti tawng ka hoek Abana kawn simex Nerax ti pielhen ka maix, sonsang pon tawng nawh krax lih krax laig maix mai sonsang tawng nawh ka pa sang yuh maix khawmuik.” ²⁶ Khaix hoik lih hu Yuabax khaing plak sivoe ngai Davit, nawh ploi siliex tix hu hawt khaix Abana, kix krup nawh hawt rawm dauw Sirax mai deeh giex nawh hoek, viang mawh nan, Davit ang tawng ka grawng an. ²⁷ Yam deeh hoek Abana ka dauw veng Hebron, Yuabax kok nawh hoek ka diang siviex veng sonsang briex mox ti sikah tau mai nawh mai blung vaig nawh kieh yum tan, son nham pux nawh Asahelax heue. ²⁸ Yam hoik mhong Davit ka grawng in, nawh ah nin, “Meung haktiex aux khawm tokaux aux ang lai koe phimap ka plak sivoe Simiang Siyiex, ka son phimap pa pah Abana kawn simex Nerax.” ²⁹ Kieh phimap an hoek piang kaing Yuabax mai doeh nyiexma keeing nawh mai kieh pui pa koe jhawm saux yia angah, pui pa koe jhawm saux sipawg angah, pui pa kawm nyoi angah mai pui pa yum ka lawm vaid angah mai pui pa cudcha ka priex angah, kieh mawh pa ang judjai ka dauw nyiexma Yuabax.” ³⁰ Mawh

kheu nan, Yuabax mai pux nawh Abishie hoik pah Abana, kheu jao hoikpahnawh ka puxkix Asahelax ka dauh naing Gibion.

Davit Yiemdoe Son Abana

³¹Davit ah nin ka Yuabax mai pui pa ot mai nawh, "Riah kraung ceep pex mai ceep ka man chee rhix mai yiemdoe ka son Abana" mai Davit kawx hu yam sipaung ka Abana. ³²Kix sipaung Abana ka dauh veng Hebron mai simiang yiem hawt simeeig Abana tan, pui khawmuik kawx yiem kah. ³³Simiang yiemdoe son Abana ah nin, "Mawh sang keung Abana ti yum awm yum pui caox tix kaux lie? ³⁴Taix maix ka ang phiawk tix, caong maix ka ang vien tix maix hoik yaox ti yum awm yum pui ka plak sivoe ngai pui caox khankix, khaix an pui khawmuik deeh baox yiem ka son nawh." ³⁵Yam hoek pui ti sang tawx Davit ih priex ponngaix, Davit tiextu ah nin, "Phan aux cim blah angah, pa ih tix ceuceu angah ka sang klip singaix, kieh Siyiex yuh pa nielheu kin khaing in piang aux." ³⁶Pui khawmuik een ti tawng grawng ceu an mai khawrhawm ka can pa hoik yuh simiang khawmuik. ³⁷Pui khawmuik mai pui Isarelix tak tawng grawng ang simiang tie koe rhawm ti sang pah ka Abana kawn simex Nerax dauh singaix an. ³⁸Khaix an, simiang ah nin ka siliex tix khankix, "Mawh ang pex tawng ka yum simiang tix kaux, pui ting dauh pui Isarelix dauh in singaix?" ³⁹Viang aux mawh simiang pa hoik groi pex bee ka kawx, aux mawh pa iak riang ka dauh singaix, pui inkix pa mawh kawn simex Zeruya mawh pa ting riang khaing aux, kieh Simiang Siyiex deeh plud ka kix awm yuh kix pa caox heue."

Pah Ka Ishabawshiet

4 Yam hoik mhong kawn simex Sawlux pa mawh Ishabawshiet ka hoik yum Abana ka dauh veng Hebron, nawh dahrhawm mai pui Isarelix kawx hoik khirhawm kah. ²Kawn simex Sawlux koe ra kaux, Bana mai Rekhap kiex mawh cao kaing krunaing nawh, kiex mawh kawn simex Rimon khaing pui Berawti mai mawh pui Benyamin, Kheu hoik mawh veng Berot, pa hoik laig ka dauh haktiex cie doehru **4:4** 2Sa 9:3. **4:10** 2Sa 1:1-16.

pui Benyamin. ³Mawh kheu pui Berawti hoik to hu ka veng Gitem mai peung tan tom in singaix. ⁴Yawnasan kawn simex Sawlux koe kawn simex tix kaux mai nawh mawh pui pa chawh caongyam koe ju phuan num. Kix mhong grawng hoek Sawlux mai Yawnasan khaing veng Yezerelax mai sibun pa hawt priex nawh, yam yaog nawh ti viex nawh to, kheu niied nawh ti to, kawn nyawm an rau piang tiex mai caong nawh khluik. Ceukaux nawh mawh Mephibawshiet. ⁵Kawn simex Rimon pa mawh Rekhap mai Bana pui Berawti lih hu ka nyiex Ishabawshiet bawgyam hax koek ponngaix, caw bawgyam it kawn nyawm an. ⁶Yam hoek kiex tan, kiex laig dauh nyiex mai yuh ti awm pui pa sang don nghox ca mai kiex blung vaig Ishabawshiet ka gawn, Rekhap mai pux nawh Bana to khaing tan. ⁷Yam hoik laig kiex dauh nyiex yam an, Ishabawshiet kawn nyawm it piangu ku it tix, ka dauh lawg, khaix an kiex blung vaig nawh ka gawn mai kiex kid ti viex kaing nawh ing mai to leeing sawm ka dauh lung dauh ngawd. ⁸Kiex viex kaing Ishabawshiet hoek ka Davit ka dauh veng Hebron mai kiex ah nin, "In mawh kaing Ishabawshiet kawn simex Sawlux pui koeng maix pa hoik sawg ka ju maix, Simiang Siyiex hoik pawk bix cao simiang aux dauh in singaix khaing Sawlux mai doehru nawh khankix." ⁹Davit deeh pawk ah nin ka Rakhap mai pux nawh Bana kawn simex Rimon pui Berawti, "Awm im ju Simiang Siyiex, pax hoik taoh ju aux khaing pui koeng aux khankix, ¹⁰yam krai pui tix kaux grawng an ka aux ah nin, "Jhak heue, Sawlux hoik yum, kix hoik keud ti viex grawng pa mhawm hoek ka aux, aux deeh giex nawh mai pah nawh ka dauh veng Zikalat, pui an keud aux sang tawx totaix ka tix son grawng an. ¹¹Lheu khaing an, yam pah pui caox ka pui pa rahsee, yam it nawh ka dauh nyiex cao tix, tak nielheu khaw ti yuh miexding? Yam in, mawh ang aux khaw ti deeh mhaing nham nawh khaing pax mai sang teei pax khaing piang haktiex in lie?" ¹²Mawh kheu nan, Davit tawx lox tix ka pui awn ju khankix mai kix pah kiex yum mai kix kid taix caong kiex mai takteue hawt rawm nhawng Hebron, kix teei kaing

Ishabawshiet mai sipaung daux simeeig Abana pa koe daux veng Hebron heue.

5 Davit Kuang Pui Isarelix (1Been 11:1-3) Khaix an, doehru pui Isarelix hoek ka Davit daux veng Hebron ah nin, “Yix mawh si-ang maix mai nexnham maix. ² Bawgyam pa hoik luan yam mawh Sawlux simiang piang yix, maix hoik mawh pa thong bung ka pui Isarelix lih hu mai thong kix deeh laig mai Simiang Siyiex ah nin ka maix, “Maix tak mawh cao liang yung cub pui Isarelix mai mawh cao pa kuang piang pui Isarelix.” ³ Cub kuad riex ju pui Isarelix khawmuik hoek bleeh ka simiang daux veng Hebron, simiang Davit yuh sijax mukheu tau mai kix ka plak sivoe Simiang Siyiex mai kix yaog nawh mawh simiang piang pui Isarelix. ⁴ Yam jah Davit ti kuang piang kix, nawh koe ju tixngoe num mai nawh kuang piang kix tixpon num. ⁵ Nawh ot ka daux veng mai kuang ka haktiex pui Yudax aliah num liah khix mai ot ka daux veng Yerusaliem mai kuang ka haktiex pui Isarelix mai haktiex pui Yudax tixngoe num.

Davit Rhim Tab Zion (1Been 11:4-9)

⁶ Simiang mai pui nawh khankix lih hu ka veng Yerusaliem sonsang puing ka pui Yebusix, pui pa ot ka daux haktiex an hoek ah nin ka Davit, “Maix ang pon ti laig tin, pui dug ngai mai pui pa laux caong tak pon tiebtie maix,” mai kix keud, “Davit ang doh pon laig.” ⁷ Viang yuh ka mawx kawx, Davit pon rhim ti teei Zion nyiex pa kauxcong, pa mawh veng Davit. ⁸ Ka daux singaix an Davit ah nin, “Phan pui tix kaux kaux hoik puing ka pui Yebusix, kieh nawh haok hawt klawng yongsang puing ka pui laux caong mai pui dug ngai pa mawh pui koeng ka Davit, pui pa pex puing, tak kieh nawh mawh cao kaing krungaing,” mawh kheu hoik koe lox pa ah nin, “Paw kieh pui dug ngai mai pui laux caong laig ka daux nyiex.” ⁹ Mawh kheu Davit ot ka dee pa kauxcong mai kix kok dee an mawh veng Davit, khaix an Davit deeh cox sum hawt vingviang Milaw, khawm plak daux 5:4-5 1Sim 2:11, 1Been 3:4, 29:27. 5:6 Yaw 15:63, Cao 1:21.

khawmuik. ¹⁰ Simiang Siyiex Cao krungaing raoma pa ting piang khawmuik ot tau mai nawh, mawh kheu nan, Davit haok huan sipie mai mawh pui pa kied ting riang heue.

Hiram Mai Davit (1Been 14:1-2)

¹¹ Simiang Hiram khaing veng Taira, ploic cao cau tix khankix hu tau mai khaox Arit mai cao chix kaing khaox mai cao chix sang simaoh hoek ka Davit mai kix sum nyiex haw tix lhang ka son Davit. ¹² Davit hoik tawng ka yaog Simiang Siyiex nawh mawh simiang piang pui Isarelix mai hoik tawx meung haktiex ka son pui Nawh Isarelix.

Davit Baox Koe Kawn (1Been 3:5-9; 14:3-7)

¹³ Davit baox teei ti koe moengi iak khankix daux veng Yerusaliem khaix hoik gah nawh ti khaing veng Hebron mai nawh baox koe kawn simex kawn sibun tomnie. ¹⁴ Inkix mawh ceukaux kawn pa hoik keh son nawh ka daux veng Yerusaliem, mawh Shammua, Shobap, Natan, Sawlamon, ¹⁵ Ibaha, Elishua, Nephiet, Yaphia, ¹⁶ Elishama, Elidax mai Eliphaliel khankix heue.

Grawng Som Pui Philitix (1Been 14:8-17)

¹⁷ Yam hoik mhong pui Philitix ka groi kix bee mai hoik yaog kix Davit mawh simiang piang pui Isarelix, pui Philitix khawmuik hu sawg ka Davit, Davit mhong grawng an, nawh hu laig ka dee pa kauxcong. ¹⁸ Pui Philitix hoek tomnie mai phrukphrat paox tix ot ka daux lung daux ngawd Repharim. ¹⁹ Davit chawk Simiang Siyiex ah nin, “Mawh sang caw aux ti hu puing ka pui Philitix inkix lie? Mawh sang ap Maix Cao kix ka daux taix aux lie?” Simiang Siyiex deeh ah nin ka Davit, “Lih hu heue, Aux sang ap kix ka daux taix maix tete.” ²⁰ Davit hu ka veng Balaxperazem mai yuh kix laux tan mai nawh ah nin, “Siyiex yuh pui koeng aux laux ka plak sivoe aux, awm pukpak rawm, mawh kheu nan, nawh kok dee an mawh Balaxperazem. ²¹ Pui Philitix hoik prah rieanggrang pa krub tix tan, Davit mai pui nawh gleeing ti tik ankix. ²² Pui Philitix baoh hoek tix bawg mai phrukphrat paox tix ot daux lung daux ngawd Epharim. ²³ Yam chawk Davit ka Simiang Siyiex, Nawh Cao pawk ah nin, “Paw hu see dee ot kix, lailawm plak khaix kix mai haok ka plak sivoe deekoe

nongkhaoxliah khankix.”²⁴Yam mhong maix ka lox sinum hu pui naing ka piang rao khaox liah, maix niied ti sau riang tix, mawh kheu Simiang Siyiex tak hu ka plak sivoie maix sonsang pah Nawh Cao tab pui Philitix.”²⁵ Davit hawt ti yuh awm lox pa hoik tawm Simiang Siyiex ka nawh mai nawh hoik pon grheu pui Philitix lih khaing daux veng Gebax tom hoek ka veng Gezerax heue.

6 Davit Viex Teug Buan (1Been 13:5-14)
 Davit khrawm pui pa hoik laug nawh khaing daux pui Isarelix loe mheen kaux.² Davit yaog ti kaoh hu tau mai pui pa koe tau mai nawh khaing veng Balax pa koe daux haktiex Yudax sonsang deeh teei nawh ti viex teug buan Siyiex khaing tan, pa hoik kok kix ceukaux mawh min ceukaux Simiang Siyiex Cao pa ting piang khawmuik, pa koe sinax rieang Cherubin.³ Kix deuh teug buan Siyiex piang linglawx pa khraox tix lhang mai kix viex lih khaing daux nyiex Abinadat pa koe piang gawng, Awza mai Ahio kawn simex Abinadat mawh cao pa grheu linglawx khraox an.⁴ Kix viex teug buan an lih hu khaing nyiex Abinadat pa koe piang ton gawng, Awza hawt hu praok teug buan Siyiex, Ahio mawh cao pa hu sivoie teug buan an.⁵ Davit mai pui Isarelix tah ting kuceu, pa mawh ting plah khaox, ting sideet, ting pawd, kraung, pi biang mai chiang mai yuh krax gauxrhawm ka plak sivoie Simiang Siyiex.⁶ Yam hoek kix ka guang dee dig Nakhon nghox, kheu sideeing moi caong tix, Awza nyeu taix ti giex ka teug buan Siyiex.⁷ Krax songrhawm Simiang Siyiex lih piang Awza mai Siyiex ciyang ka nawh, kheu pa lud nawh mai nawh yum tan praok teug buan Siyiex.⁸ Davit songrhawm kheu jao ciyang Simiang Siyiex ka Awza mai nawh kok dee an mawh “Perezawza tom hoek daux in singaix.”⁹ Davit koe krax lhatgraung ka Simiang Siyiex ka daux singaix an ah nin, “Teug buan Simiang Siyiex sang pon hoek ka aux yuh ka mawx?”¹⁰ Mawh kheu nan, Davit ang lai pon gah tix viex teug buan Simiang Siyiex hoek tau mai tix ka daux
 6:2 Lih 25:22. 6:3 1Sa 7:1-2. 6:11 1Been 26:4-5. 6:19-20 1Been 16:43.

veng Davit, Davit deeh viex teug buan an mai deuh daux nyiex Obetdedom pui Gitix.¹¹ Teug buan Simiang Siyiex ot daux nyiex Obetdedom pui Gitix loe khix, Simiang Siyiex nawb buan piang Obetdedom mai khawm piang pui daux nyiexma nawh.

Viex Teug Buan Hoek Yerusalim

(1Been 15:1; 16:6)

¹² Yam mhong simiang Davit ka nawb Simiang Siyiex buan piang nyiexma Obetdedom mai piang can pa koe nawh kheu jao teug buan Siyiex, mawh kheu nan, Davit deeh hu mai teei teug buan Siyiex khaing daux nyiex Obetdedom, hoek ka veng Davit tau mai krax pa gauxrhawm tix.¹³ Khaix hoik klawm pui teug buan Simiang Siyiex hu liah diang, nawh yuh krax tan pa appong ka mawie mai kawm yung pa kluing.¹⁴ Davit ceep sibex dhah pa caing ka man tix pheem mai sau riang rao tix graoh ka plak sivoie Simiang Siyiex.¹⁵ Mawh kheu nan, Davit mai pui Isarelix viex teug buan Simiang Siyiex hoek tau mai pa yo tix lox sinum mai khawm lox luh teettawng.¹⁶ Yam laig teug buan an daux veng Davit, Mikhalax kawn sibun Sawlux kox jhak khaing daux siviex vawng, nawh yaox ka yaog Davit ti graohkhawm rhawm tix ka plak sivoie Simiang Siyiex mai nawh sibriem Davit ka daux rhawm tix.¹⁷ Kix viex teug buan Simiang Siyiex hoek tan mai deuh daux sigreung nyiex gox buan man pa hoik sum Davit mai Davit tan krax tan pa gleeing mai krax tan pa nhim ka plak sivoie Simiang Siyiex.¹⁸ Khaix hoik tan Davit ka krax tan pa gleeing mai krax tan pa nhim, nawh nawb buan piang pui khankix daux min ceukaux Simiang Siyiex Cao pa ting piang khawmuik.¹⁹ Nawh tawx blah tix kaux tix lon mai nex tix kaux tix khik mai khlawp blah plix siiet kroh tix kaux tix khlawp ka pui Isarelix khawm simex khawm sibun khawmuik, khaix an pui khankix deeh ing ka nyiexma tix.²⁰ Davit deeh ing sonsang nawb buan piang kawm nyiexma tix, Mikhalax kawn sibun Sawlux hoek rieb Davit ah nin, “Simiang pui Isarelix yuh sonsang koe min plakngai tix daux in singaix tau mai pa hoik peeik kraung ceep tix ka plak sivoie ngai siliex simex siliex sibun tix daux pa ang tawng ti kaigtua mai

ang ceep kraung ceep tix.”²¹ Mawh kheu nan, Davit ah nin ka Mikhalax, “Aux yuh an ka plak sivoe Simiang Siyiex pa hoik laug ka aux, sonsang yaog Nawh Cao aux mawh cao pa kuang piang pui Simiang Siyiex mai piang pui Isarelux tang keeing maix mai tang paox nyiexma nawh, mawh kheu nan, aux tom tah ting mai graoh ka plak sivoe Simiang Siyiex.”²² Aux tak nielheu mawh pa iak min plakngai khaing in mai aux yeen rhawm tix tiem mai siliex sibun pa hoik kraim maix ankix, tak yaogyaw ka aux.”²³ Mawh kheu jao an, Mikhalax kawm sibun Sawlux ang lai chix koe kawm tom sidah yum nawh heue.

Gumlox Sijax Mukheu Mai Davit

(1Been 17:1-27)

7 Yam simiang Davit lauxlee tix mai ot yawgyien ka daux nyiex haw nawh, kheu hoik kieh Simiang Siyiex nawh lawdluan khaing pui koeng khankix pa koe hawt rawbrim nawh khawmuik,² Simiang Davit ah nin ka cao jhai Natan, “Jhak heue, aux yaox ti ot nyiex haw khaox Arit, viang mawh nan, teug buan Siyiex kawm ca yaox ti ot ka daux nyiex gox man.”³ Natan deeh ah nin ka simiang, “Hu heue, yuh awm pa koe rhawm maix, mawh kheu Simiang Siyiex tak ot tau mai maix.”⁴ Viang mawh nan, daux sawm an, gumlox Simiang Siyiex hoek ka Natan ah nin,⁵ “Hu mai kraim grawng in ka siliex Aux Davit awm pa hoik kraim Simiang Siyiex, mawh sang yaox maix ti sum nyiex sonsang ot Aux lie?”⁶ Aux ang nyang yaox ti ot daux nyiex, glang bawgyam hoik viex Aux pui Isarelux lih khaing daux meung Ejiptux tom hoek ka daux in singaix, Aux hoik vungviang ti ot daux nyiex gox man.⁷ Can dee hoik hu Aux tau mai pui Isarelux, hoik sax kraim Aux ka cao prawngsee doehru pui Isarelux pa hoik tawx prieh ih ka pui Aux Isarelux, yuh ka mawx maix lai ang sum nyiex khaox Arit son Aux.”⁸ Mawh kheu nan maix ah nin ka siliex Aux Davit, Simiang Siyiex Cao pa ting piang khawmuik ah nin, Aux hoik teei maix lih khaing dee pa liang maix yung, sonsang mawh maix cao pa kuang piang pui Aux Isarelux.”⁹ Aux hoik ot tau mai maix ka

7:14 2Kaw 6:18, He 1:5, Jhi 21:7.

can dee hu maix kudah mai hoik yuh pui koeng maix laux plak sivoe maix mai Aux hoik yuh min ceukaux maix ting lhaong awm min ceukaux pui pa kied ting lhaong pa ot piang haktiex in.¹⁰ Lheu khaing an, Aux tak laug dahdee tix dah ka son pui Aux Isarelux mai Aux tak kieh kix ot kauxcong tan mai kix tak yaox ti ot ka daux dee cie cao kix mai ang lai yaox ti gah tix, tix bawg kawx mai pui caoxcaig tak ang lai pon tuktiak ka kix tix bawg kawx, awm bawgyam pa hoik luan,¹¹ Awm koe ceu pa tuktiak ka daux bawgyam hoik ap Aux cao prawngsee mawh cao pa kuang piang pui Aux Isarelux, Aux tak ang lai baox kieh koe tix bawg, Aux hoik kieh maix lawdluan khaing taix pui koeng mai hoik kieh maix ot yawgyien tix mai Aux tak kieh doehru maix kauxcong heue.¹² Yam hoik naog singaix ju maix, maix tak yaox ti lauxlee tix tau mai cub taxdu maix, Aux tak yaog ti deuh doehru pa lih khaing tokaux maix mai Aux tak kieh meung haktiex nawh kauxcong.¹³ Nawh tak sum nyiex tix lhang ka son min ceukaux Aux mai Aux tak pang ti deuh dangngeung meung haktiex nawh leeingju.¹⁴ Aux tak mawh keeing nawh mai nawh tak mawh kawm simex Aux, phan nawh lud, Aux tak sivied ti gau nawh ka khaox puat awm sidiex kawm pui kawm tix.¹⁵ Viang mawh nan, krax pa cauxrhawm Aux tak ang lai gah tix khaing nawh, awm hoik teei Aux ti tik Sawlux khaing ka plak sivoe pex.¹⁶ Doeh nyiexma maix khawm meung haktiex maix, tak mawh pa kaux leeingju ka plak sivoe maix, dangngeung maix tak mawh pa kauxcong leeingju.”¹⁷ Mawh kheu nan, Natan hoik kraim grawng pa plak jhi Simiang Siyiex ka Davit.

Davit Yaogyaw Buanson Siyiex

¹⁸ Yam an, simiang Davit laig ka plak daux mai ngawm ka plak sivoe Simiang Siyiex ah nin, “Simiang Siyiex eue, mawh aux pui pa yuh ka mawx? Nyiexma aux mawh pa yuh ka mawx? Maix Cao hoik yaogaux hoek ka dee pa kied lhaong in yuh ka mawx?”¹⁹ Simiang Siyiex eue, in mawh ceu pa iak sivoe ngai Maix Cao, Maix Cao baox kraim grawng in ka doeh nyiexma siliex Maix, son bawgyam pa tak

sang hoek, Simiang Siyiex eue, mawh in grawng pa sax yuh kawn pui lie? ²⁰Yam in Davit kawn sang pon ah patix ka Maix Cao lie? Maix Cao hoik tawng ka siliex Maix. ²¹Son min plakngai gumlox Maix Cao mai awm pa koe alo Maix Cao, Maix hoik yuh ceu pa ting lhaong inkix, sonsang kieh Maix siliex tix tawng grawng ceu in. ²²Mawh kheu nan, Simiang Siyiex eue, Maix Cao mawh pa ting lhaong, mawh kheu ang lai koe Siyiex pa awm Maix tix kaux kawx, awm pa hoik sax mhong yix ka yaok tix, lheu khaing Maix Cao Siyiex tang kaux ang lai koe. ²³Mawh pui mawx pa sang awm pui Maix pui Isarelix pa hoik taoh Maix ti kieh mawh pui Tix khaing piang haktiex in? Maix hoik jhi min ceukaux Tix daux kaing jhaw pa ting lhaong, khawm ceu pa kied lhatgraung ka son haktiex Maix mai ka plak sivoie pui cie Maix, pa hoik taoh Maix khaing meung Ejiptux mai khaing meung tangdah khankix mai khaing sinax siyiex kix. ²⁴Mawh kheu Maix Cao hoik yuh pui Isarelix mawh pui Tix sonsang mawh kix pui Maix leeingju, Maix Cao hoik mawh Simiang Siyiex kix. ²⁵Simiang Siyiex eue, lox pa hoik kraik Maix Cao grawng pa dex mai siliex Maix Cao mai pa dex mai doeh nyiexma nawh, kieh mawh pa kaux leeingju awm pa hoik kraik Maix Cao. ²⁶Kieh min ceukaux Maix Cao mawh pa yaogyaw ting lhaong leeingju tau mai pa ah nin, kieh Simiang Siyiex Cao pa ting piang khawmuik mawh Siyiex ka piang pui Isarelix mai kieh doeh nyiexma siliex Maix Davit mawh pa kauxcong ka plak sivoie Maix Cao. ²⁷Grawh grawng nawh, Simiang Siyiex Cao pa ting lhaong mai pa mawh Siyiex pui Isarelix eue, Maix Cao hoik plak jhi grawng ceu inkix ka siliex Maix ah nin, Aux tak sang kieh nyiex haw koe ka son Maix, kheu hoik kieh Maix Cao aux yaox ceu in ka daux rhawm tix, aux tom rawgbuan ka Maix Cao. ²⁸Yam in kawx Simiang Siyiex eue, Maix Cao mawh Siyiex tete mai gumlox Maix kawx, mawh pa mawhmeh, Maix Cao hoik yuh gumlox pa kaux sijax Tix ka siliex Maix Cao. ²⁹Mawh kheu nan, kieh ceu in mawh pa khawrhawm Maix Cao, nawbbuan piang doeh nyiexma siliex Maix,

Simiang Siyiex eue, awm pa koe rhawm Maix Cao, kieh doeh nyiexma siliex Maix mawh pa pon buanson plak sivoie Maix Cao leeingju liak."

8 *Grawng Baox Pex Davit* (1Been 18:1-13)

Davit deeh puing pui Philitix mai pex ka kix mai nawh rhim ti teei veng Mategama khaing pui Philitix. ²Khaix an, nawh pexhaktiex Mawbax mai khin kix it piang tiex mai tiag ti yaox kix ka maox khaing daux loe cub, nawh pah kix ra cub mai nawh kieh an tix cub klawd, mawh kheu nan, pui Mawbax yuh siliex Davit mai yaox ti tawx keen ka nawh. ³Davit baox pex ka Hadadeza kawn simex Rehawbax simiang veng Zawbax, yam an mawh bawgyam hu rhim Hadadeza haktiex kuang tix hawt rawm klawng Yufrethix. ⁴Davit pon rhim linglawx brung naing tix rheng lhang mai lien naing brug brug aliah yieh, cub lien caong ra mheen. Davit yuh linglawx brung naing lauxleeing khawmuik mai nawh teei linglawx brung naing son tix tix yieh lhang khaing. ⁵Yam hoek pui Shurix khaing veng Damase ti sang teem ka Hadadeza pa mawh simiang Zawbax, Davit baox pah pui Shurix ra mheen ra rheng kaux. ⁶Khaix an, Davit deuh cub lien pau veng ot ka daux veng Damase pa koe daux haktiex Shurix tan mai pui Shurix deeh mawh siliex Davit mai yaox ti tawx keen ka nawh, Simiang Siyiex priex jhung Davit ka can dee hu nawh. ⁷Davit rhim ti teei plah khri tiebtie cie siliex Hadadeza mai viex ing ka veng Yerusaliem. ⁸Khaing daux veng Betax mai veng Berawtie pa hoik kuang veng Hadadeza kah, simiang Davit hoik rhim ti teei tawng lheung ing tomnie. ⁹Yam mhong Taw-ix pa mawh simiang veng Hamat ka hoik pex Davit ka krungaing Hadadeza khawmuik, ¹⁰khaix an, Taw-ix ploi Yawram kawn simex tix hu ka simiang Davit mai Yawram viex kraung mau, kraung khri mai tawng lheung sonsang rieb nawh mai sonsang nawb buan piang nawh, kheu jao pex Davit ka Hadadeza, mawh kheu Hadadeza hoik yuh naing ka Taw-ix glang ka singaix an. ¹¹Simiang Davit hoik appong ceu ankix ka Simiang Siyiex tau mai mau khri pa hoik pon nawh khaing haktiex pa hoik pex tix khankix ¹²khaing haktiex Shurix haktiex

Mawbax, haktiex Amon, haktiex Philitix, haktiex Amaliet, kawn simex Rehawbax pa mawh simiang veng Zawbax. ¹³ Davit hoik pon min ceukaux tix yam deeh ing nawh khaing pah tix pui Shurix, pui Edom tix mheen dim rheng kaux ka daux ngawd kih. ¹⁴ Nawh hoik deuh cub lien pa pau veng ka haktiex Edom khawmuik, pui Edom hoik mawh siliex Davit khawmuik mai Simiang Siyiex hoik priexjhung Davitkacan deehunawh.

Krax Kuang Davit (2Sam. 20:23-26, 1Been 18:14-17)

¹⁵ Mawh kheu nan, Davit kuang piang haktiex Isarelix mai prawng rahsee piang pui nawh khawmuik. ¹⁶ Yuabax kawn simex Zeruya mawh cao kaing naing ting piang krunaing khankix mai Yehoshaphat kawn simex Ahilut mawh cao kaing pa priex carang. ¹⁷ Zadok kawn simex Ahitut mai Ahimaliet kawn simex Abiatha mawh cao giex kaing li mai Seraya mawh cao kaing tiem lai ¹⁸ mai Benayax kawn simex Yehoyadax pa mawh cao kaing pa kuang piang pui Kheretix mai piang pui Peletix khankix mai kawn simex Davit mawh cao giex kaing liheue.

9 Grawng Cauxrhawm Davit

9 Davit ah nin, sonsang pon aux ti jhi krax cauxrhawm tix ka son min ceukaux Yawnasan, "Mawh kawn koe pui tix kaux kaux khaing daux paox nyiex Sawlux lie?" ² Koe pui tix kaux pa mawh siliex daux nyiexma Sawlux ceukaux nawh mawh Zibax, yam kok kix nawh hoek ka Davit, simiang ah nin ka nawh, "Mawh maix Zibax lie?" nawh ah nin, "Mawh awm pa ah maix." ³ Khaix an simiang ah nin, "Sonsang pon jhi aux krax cauxrhawm Siyiex, mawh ang pui tix kaux kawx lai koe daux nyiexma Sawlux lie?" mai Zibax deeh ah nin ka simiang, "Kawn simex Yawnasan pa koe jhawm saux laux caong kawn koe tix kaux." ⁴ Simiang ah nin ka nawh, "Mawh ot nawh dee mawx?" mai Zibax deeh ah nin, "Nawh ot daux nyiex Makhirax kawn simex Amelax daux yaong Lawdebarax." ⁵ Davit ploï pui hu teei nawh hoek khaing daux nyiex Makhirax kawn simex Amelax khaing daux yaong Lawdebarax. ⁶ Yam hoik hoek Mephibawshiet kawn simex Yawnasan pa

8:13 Yaog 60 Title. **9:1** 1Sa 20:15-17. **9:3** 2Sa 4:4.

mawh kawn saux Sawlux, ka plak sivoë Davit, nawh gup pakngai tix mai gruxgup ka Davit, Davit ah nin, "Mephibawshiet eue," nawh pawk ah nin, "Siliex maix ot tin." ⁷ Davit ah nin ka nawh, "Paw lhat, mawh kheu aux tak jhi krax cauxrhawm tix ka maix, son min ceukaux keeing maix Yawnasan mai aux tak deeh tawx haktiex tax maix Sawlux ka maix, maix tak yaox ti ih blah piang pheem sawm aux ku ngaix jheengjheeng." ⁸ Yam an Mephibawshiet gup tix ah nin, "Mawh kheu grawng ceu patix maix lai sang kiangien ka siliex maix pa awm sox yum lie?" ⁹ Simiang kok Zibax siliex Sawlux ah nin ka nawh, "Aux hoik tawx can pa mawh cie Sawlux mai cie paox nyiex nawh khawmuik ka kawn simex cao simiang maix." ¹⁰ Maix mai kawn simex maix khawm siliex maix, tak yaox ti yuh kaung ma son nawh mai viex ti tawx plix nghox plix koi ka kawn simex cao simiang maix, sonsang yaox nawh ti ih pa ih, mawh kheu nan, Mephibawshiet kawn simex cao simiang maix tak ih blah piang pheem aux ku ngaix jheengjheeng. Zibax hoik koe kawn simex kao phuan kaux, tau mai siliex nawh tixnga kaux. ¹¹ Zibax deeh ah nin ka simiang, "Awm hoik tawm cao simiang aux ka siliex tix, siliex maix tak yuh." Mawh kheu simiang hoik ah yuh nin son Mephibawshiet, phan mawh Mephibawshiet nawh tak ih priex tau mai aux piang pheem sawm cao aux, awm kawn simex simiang tix kaux. ¹² Mephibawshiet koe kawn simex iak pa kaux Mikha pui pa hoik ot ka daux nyiex Zibax khankix mawh siliex Mephibawshiet khawmuik. ¹³ Mawh kheu nan, Mephibawshiet ot ka daux veng Yerusalem mai yaox ti ih priex jheengjheeng piang pheem sawm simiang, nawh mawh pa laux caong khawm ra khawn heue.

Pui Amawrix Mai Pui Shurix Som

(1Been 19:1-19)

10 Khaix hoik yum simiang pui Amon, kawn simex nawh Hanun deeh plud ti kuang haktiex piang danggeung keeing tix. ² Davit ah nin, "Aux sang jhi krax cauxrhawm tix ka Hanun kawn simex Nahasha awm pa hoik jhi keeing nawh krax cauxrhawm tix ka

aux,” mawh kheu nan, Davit ploi siliex tix hu ka nawh mai kieh kix ah lox pa nyawm rhawm ka grawng pa dex dawt tau mai pa yum keeing nawh, siliex Davit hu laig ka dauh haktiex pui Amon. ³ Cub cao kaing pui Amon khankix hoek ah nin ka cao simiang kix Hanun, “Mawh keud maix Davit sang yaog min plakngai keeing tix kheu ploi nawh pui tix hoek ah lox pa khurhawm ka maix lie? ang mawh Davit pa hoik ploi siliex tix hoek sonsang sawg khrieh kix ka veng mai jiang ti yaox grawng pa sang yuh kix pa lauxleeing lie?” ⁴ Mawh kheu nan, Hanun tei siliex Davit hoek ka tix, nawh khlahauk bheup kix tix plak mai baoh rhip sigreung kraung ceep kix tom hoek ka beem kre kix mai ploi kix ing. ⁵ Yam deeh kraik kix grawng an ka Davit, nawh ploi pui hu rieb kix dauh krax, kheu kied kaig kix mai simiang ah nin, “Jun ti ot ka dauh veng Yerikho tan, tom hoik deehkuah hauk bheup pex mai deeh hoek khaix awx.” ⁶ Yam yaox pui Amon hoik yuh tix pa seeing brai ka Davit, kix ploi pui hu vai ka pui Shurix khaing veng Bietrehawbax mai khaing veng Zawbax ra mheen kaux mai krunaing caong khaing simiang Makha tix rheng kaux mai khaing veng Tawbax tix mheen ra rheng kaux. ⁷ Yam hoik mhong Davit ka grawng an, nawh ploi Yuabax mai krunaing pui pa kied ting riang khankix lih hu. ⁸ Pui Amon hoek mai khrierien ti sang puing naing hawt diang laig siviex veng mai pui Shurix pa kaoh khaing veng Zawbax, veng Rehawbax mai veng Tawbax mai pui simiang Makha hoik tang tei dee ot tix dauh lung. ⁹ Yam yaox Yuabax koe mee ka plak sivoe mai plak khaix nawh, nawh laug tei pui pa hoik laug nawh khaing pui Isarelax mai ploi kix yuh naing ka pui Shurix. ¹⁰ Nawh ap pui pa deuk khankix ka greem pa kuang pux nawh Abishie sonsang ploi kix yuh naing ka pui Amon. ¹¹ Nawh ah nin, “Phan pui Shurix ting riang khaing aux maix tee yaox ti teem ka aux, phan pui Amon kied ting riang khaing maix, aux kawx tak hoek teem ka maix.” ¹² Kieh koe rhawm kua rhawm vao mai kieh ex ting riang ka son

11:1 1Been 20:1.

pui ex mai son veng Siyiex ex, kieh Simiang Siyiex yuh awm pa koe alo Nawh Cao.” ¹³ Yuabax mai pui ot tau mai nawh greed ti dex sonsang yuh naing ka pui Shurix, kix hoik to ka sivoe nawh. ¹⁴ Yam yaox pui Amon hoik to pui Shurix, kix kawx deeh to ka sivoe Abishie mai laig dauh veng, mawh kheu nan, Yuabax deeh ing khaing puing tix pui Amon mai deeh hoekka Yerusalieim. ¹⁵ Yam yaox pui Shurix som tix ka pui Isarelax, kix deeh khrawm paoh tix. ¹⁶ Khaix an, Hadadeza deeh ploi pui kok ka pui Shurix pa ot toi rawm klawng Yufrethix mai kix hoek ka veng Helam mai Shawbiet cao kaing krunaing Hadadeza mawh cao thong kix. ¹⁷ Yam kraik kix an ka Davit nawh deeh khrawm pui Isarelax mai kix tiang klawng Yawdan mai hoek ka veng Helam, pui Shurix rieb ti puing ka cub Davit. ¹⁸ Khaix an, pui Shurix to ka sivoe pui Isarelax mai Davit pon pah cub linglawx naing brung aliah yieh kaux mai khawm pui naing brung pon mheen kaux mai nawh baoh pah Shawbiet cao kaing krunaing kix yum tan. ¹⁹ Cub simiang pa hoek yuh siliex Hadadeza hoik yaox som tix ka pui Isarelax, kix deeh yuh pa nhim mai pui Isarelax mai yuh siliex kix, mawh kheu nan, pui Shurix lhat mai ang lai kan teem ka pui Amon tix bawg kawx heue.

11 *Grawng Davit Mai Batashebox*

11 Khaix hoik luan bawgyam tix num mai hoek bawgyam yuh simiang naing, Davit ploi Yuabax mai siliex tix mai pui Isarelax hu dauh naing mai kix pex ka pui Amon mai lailawm ka veng Rabax, viang mawh nan, Davit kawn ot khaix kix dauh veng Yerusalieim. ² Dauh tix ngaix plakbo Davit kaoh khaing it tix mai lailing piang braux nyiex haw tan, nawh yaox ka heem sibun tix, sibun an kied mhawm grang. ³ Mawh kheu nan, Davit ploi pui hu chawg grawng sibun an mai pui an deeh hoek ah nin, “In mawh Batashebox kawn bun Eliam mai mawh moeng Uriyax pui Heta.” ⁴ Davit ploi pui cau tix hu kok sibun an hoek, yam bleeh sibun an Davit it tau mai nawh, khaix an sibun an deeh yuh tokaux tix singax khaing pa seeing brai tix mai

deeh ing ka nyiex tix. ⁵ Sibun an hoik koe kaux, mawh kheu nan, nawh ploi pui hu kraï Davit mhong ah nin, "Aux hoik koe kaux." ⁶ Davit deeh ploi pui hu ka Yuabax mai ah nin ka nawh, "Ploi Uriyax pui Heta hoek ka aux" mai Yuabax ploi Uriyax hu ka Davit. ⁷ Yam hoek Uriyax, Davit chawk grawng nyawm ot Yuabax mai grawng krax ot krax koe pui khankix mai grawng pa hoik pex nawh khankix. ⁸ Davit ah nin ka Uriyax, "Deeh ing ka nyiex maix mai khoek caong tix," mawh kheu nan, Uriyax lih khaing daux nyiex simiang mai simiang hoikkieh kix hawt ti tawx totaix pa ih ka nawh. ⁹ Viang mawh nan, Uriyax ang ing ka nyiex tix mai nawh it hawt diang siviex nyiex haw simiang tau mai siliex simiang khankix. ¹⁰ Yam kraï kix grawng ang Uriyax ing ka nyiex tix ka Davit mai Davit ah nin ka Uriyax, "Mawh ang maix mawh pa kaoh khaing hu tix krax lie? Yuh ka mawx maix lai ang hu ka nyiex cao tix." ¹¹ Uriyax ah nin ka Davit, "Teug buan mai pui Isarelaix mai pui Yudax kawm ot daux nyiex gox mai cao simiang aux Yuabax mai siliex nawh kawm pan daux ngawd daux lung, mawh sang khaw aux ti hu ka nyiex tix, sonsang ih nyaux mai it tau mai moeng tix lie? Awm kawm im ju maix aux ang pon yuh ceu in." ¹² Khaix an, Davit ah nin ka Uriyax, "Baot tin daux in singaix, pasax aux tak kieh maix hu," mawh kheu nan Uriyax ot ka daux veng Yerusalieim singaix an tom hoek pasax. ¹³ Davit kok nawh ih nyaux tau plak sivoë tix mai nawh hoikkied nie nyaux tom yoëk tix, hoëk plak bo nawh deeh hu piang ku it tix tau mai siliex cao simiang nawh mai nawh ang ing ka nyiex cao tix. ¹⁴ Yam hoëk plak ponngawb Davit tiem lai ka Yuabax mai tawx Uriyax viex hu. ¹⁵ Nawh tiem ah nin daux lai, "Tawx Uriyax hu sivoë dee kin naing mai deeh dak ti ing khaing nawh, sonsang laig nawh daux tawm taix pui koeng mai yaox ti yum kah." ¹⁶ Yam hoik lih hu Yuabax ti lailawm ka veng, nawh tawx beeh glawm ka Uriyax, ka dee hoik tawng nawh koe cub pui pa koe rhawm vao rhawm kua. ¹⁷ Pui daux veng an lih hoëk ti puing ka cub Yuabax mai siliex Davit yum **11:21** Cao 9:53. **12:1** Yaog 51 Title.

tan tixblah mai Uriyax pui Heta kawx yum tan. ¹⁸ Yuabax ploi pui deeh ing kraï Davit mhong grawng pa dex mai naing khankix ¹⁹ mai nawh tawm lox ka pui cau an ah nin, "Yam hoik kraï maix grawng naing khankix ka simiang, ²⁰ phan simiang meet rhawm, nawh tak ah nin ka maix, yuh ka mawx pex lai greed ti hu dex veng mai puing naing, ang pex tawng ka sang deeh puing kix pex khaing piang guh veng lie? ²¹ Mawh pui mawx pa pon pah Abimaliet kawm simex Yerubeshiet? Ang hoik mawh sibun veng Tebiet tix kaux pa dheem kaing nawh ka simaox mhaw tix plak khaing piang guh veng, tom yum nawh lie? yuh ka mawx pex greed tix dex guh veng?, khaix an maix tak ah nin, "Siliex Uriyax pui Heta hoik yum" ²² Mawh kheu nan, cao cau an lih hu khaing tan mai hoëk kraï can pa hoik tawm Yuabax ka Davit khawmuik. ²³ Cao cau an ah nin ka Davit, "Pui koeng hoik pex ka yix tete mai kix hoik pheët yix tom hoëk ka daux lung, yix kawx deeh pheët kix deeh khaix tom hoëk diang siviex veng. ²⁴ Cao pa puing ak pa ot piang guh veng puing ka siliex maix mai siliex simiang tixblah hoik yum, Uriyax pui Heta siliex simiang kawx hoik yum. ²⁵ Davit ah nin ka pui cau an, "Maix ah nin ka Yuabax, paw koe krax lauxrhawm ka grawng in, mawh kheu lawm vaid hoik lailoh ti yuh pui lauxleeing tix kaux lai tix kaux, deeh teëi riang rao ti puing mai yuh tom lauxleeing veng an, mawh kheu nan tawx riang rao ka nawh." ²⁶ Yam hoik mhong moeng Uriyax ka hoik yum mex tix, nawh yieimdoë ka son mex tix. ²⁷ Yam hoik luan krax pa yieimdoë nawh, Davit ploi pui hu teëi nawh hoëk ka nyiex haw tix mai nawh lih ti mawh moeng Davit mai nawh keh kawm simex tix kaux, viang mawh nan, pa yuh Davit mawh pa ang khaw ka rhawm Simiang Siyiex.

12 *Lox Tiag Natan Ka Davit*

Khaix an, Simiang Siyiex ploi cao jhai Natan hu ah nin ka Davit, "Ka daux veng tix veng koe pui ra kaux, tix kaux mawh pui magmi mai an tix kaux mawh pui hotsia. ² Pui magmi an koe cub yung cub mawie tomnie. ³ Viang mawh nan, pui hotsia an,

lheu khaing kawn yung shiang iak tix mu pa hoik liag nawh ti eei, nawh ang lai koe sinngao tang ceu, kawn yung shiang iak an haokhuan ting tau mai kawn praix nawh, hoikih priex cao tix, hoik nyaux rawm khaing daux kawx cao tix mai hoik it piang naok nawh awm kawn sibun nawh. ⁴Yam hoek nyo nyiex ka cao mi, nawh hoik lhawk ti teei khaing daux cub mawie cub yung cao tix sonsang khre pah kason nyonyiexpa hoekti peung mai nawh, viang mawh nan, nawh hu teei kawn yung shiang iak cie pui hotsia an mai khre ka son nyo nyiex pa hoek ka nawh.” ⁵Davit kied songrhawm ka cao mi an ah nin ka Natan, “Awm im ju Simiang Siyiex pui pa yuh ceu in keung ti yum tete.” ⁶Kieh nawh deeh plud pon son tix son piang son kawn yung shiang iak an, kheu hoik yuh nawh ceu in khawm ang koe krax cauxrhawm.” ⁷Khaix an, Natan ah nin ka Davit, “Maix mawh pui an heue, Simiang Siyiex pui Isarelah ah nin, Aux hoik groi bee mai hoik yaog maix mawh simiang piang pui Isarelah mai Aux hoik taoh maix khaing daux tawm taix Sawlux.” ⁸ “Aux hoik tawx sin nyiexma cao simiang maix mai moeng cao simiang maix piang naok maix mai Aux hoik tawx doeh nyiexma pui Isarelah mai pui Yudax ka maix, phan ceu ankix ang nyang kub ka son maix, Aux tak baox tawx tang ceu tomnie ka maix.” ⁹ “Maix lai yuh krax pa ang khaw ang jiet ka lox pingnyap Simiang Siyiex mai yuh pa caox caig ka plak sivoie ngai Nawh Cao yuh ka mawx? Maix hoik pah Uriyax pui Heta ka vaid, maix hoik teei moeng nawh mawh moeng tix, maix hoik pah nawh yum kalawm vaid pui Amon.” ¹⁰ “Mawh kheu maix hoik yuh ceu pa ang khaw ang jiet ka Aux mai hoik teei moeng Uriyax pui Heta mawh moeng tix, doeh nyiexma maix tak ang luan khaing lawm vaid tix bawg kawx.” ¹¹ Simiang Siyiex ah nin, “Jhak heue, Aux tak kieh pa caoxcaig hoek piang maix, khaing daux doeh paox nyiex maix mai Aux tak teei moeng maix ka plak sivoie ngai maix mai tawx ka paox plawg maix mai kix tak it tau mai moeng maix plak

12:11-12 2Sa 16:22.

sivoie maix yam kawn riang praix. ¹²Viang maix hoik yuh ceu in ka daux paglip, Aux tak yuh ceu in ka plak sivoie ngai pui Isarelah ka daux pa sidawng yam riang praix.” ¹³Khaix an, Davit ah nin ka Natan “Aux hoik lud ka Simiang Siyiex” mai Natan deeh ah nin ka Davit, “Simiang Siyiex hoik teei phimap maix, maix tak ang yum ka grawng in.” ¹⁴ “Viang yuh ka mawx kawx, kheu hoik tawx maix akhuang pa sang koe lox sibriem ceu pa koeng Simiang Siyiex kah, mawh kheu nan, kawn pa keh son maix yam in tak yum.” ¹⁵ Khaix an, Natan deeh ing ka nyiex cao tix mai Simiang Siyiex tawx krax khamgeu ka kawn simex Davit pa hoik keh khaing moeng Uriyax mai kieh nawh kied nie saux tete heue.

Kawn Simex Davit Yum

¹⁶ Davit deeh khioxkhaw ka Siyiex son kawn tix, Davit tuah pa ih mai laig it daux lawg piang tiex leeingsawm. ¹⁷ Cub kuad pa ot ka daux nyiex haw khankix hu yaog nawh kaoh khaing piang tiex, viang mawh nan, nawh ang cu ti kaoh mai ang cu ti ih priex tau mai kix. ¹⁸ Yam hoik naog aliah ngaix kawn nyawm an yum mai siliex nawh khankix lhatgraung mai ang kraik ka hoik yum kawn nyawm an ka nawh mai kix ah nin, “Yam kawn im kawn nyawm an, ex hoik kraik mai nawh ang tie nghiet lox kraik ex, ex sang pon kraik grawng yum kawn nyawm an ka nawh yuh ka mawx? Nawh tak yuh krax pa kharhawm ka tokaux tix tix ceuceu.” ¹⁹ Yam yaox Davit ka supshiep jheeh siliex tix, nawh tawng ka hoik yum kawn nyawm, mawh kheu nan, nawh chawx siliex tix, “Mawh hoik yum kawn nyawm an lie? Mai kix deeh ah nin, “Nawh hoik yum.” ²⁰ Khaix an, Davit yaog ti kaoh khaing piang tiex mai heem tix mai kraik bee mai loh kraung ceep tix laig ka daux nyiex buan mai krub ka Simiang Siyiex, khaix an nawh deeh ing ka nyiex tix yam mhaing nawh pa ih, kix khan priex ka plak sivoie nawh mai nawh ih kah. ²¹ Siliex nawh ah nin ka nawh, “Jao patix maix yuh nin maix hoik tuah priex mai hoik yiem son kawn nyawm yam kawn im nawh, viang mawh nan, khaix hoik yum kawn nyawm an maix deeh

yaog ti kaoh ih priex.”²² Nawh deeh ah nin, “Yam kawn im kawn nyawm in, aux tuah priex mai yiem ah nin, mawh pui mawx pa sang pon krai grawng sang koe krax pa cauxrhawm Simiang Siyiex piang aux, sonsang deeh im kawn nyawm an?”²³ Viang mawh nan, yam in nawh hoik yum, aux lai kawn sang tuah priex yuh ka mawx? Mawh sang deeh pon kieh aux nawh im lie? Aux tak hu ka nawh, viang mawh nan, nawh tak ang lai deeh hoek ka aux.”

Grawng Keh Sawlamon

²⁴ Khaix an, Davit kieh moeng tix Batashebox koe krax pa nyawmrhawm mai nawh laig it tau mai nawh, nawh keh kawn simex tix kaux mai kok ceukaux nawh mawh Sawlamon mai Simiang Siyiex moh ka Sawlamon.²⁵ Yam an, Nawh Cao deeh ploi cao jhai Natan hu mai kieh sum ceukaux nawh mawh Yedidi awm gumlox pa tawm Simiang Siyiex ka nawh, dee bleeh Yedidi mawh krax pa moh Simiang Siyiex heue.

Davit Rhim Ka Veng Rabax (1^{Been} 20:1-3)

²⁶ Yuabax hu puing ka veng Rabax veng ceu pui Amon mai dex sang pex ka veng an.²⁷ Yuabax ploi pui cau ing ah nin ka Davit, “Aux puing veng Rabax mai hoik pon rhim rawm dung nyaux veng ting an khankix.²⁸ Mawh kheu nan, Yam in khrawm can pui pa kawn deuk tau mai maix hu yuh tab hawt veng mai puing ti teei kah, phan ang mawh nan, aux rhim veng an mai tak kok ceukaux veng an mawh ceukaux aux.”²⁹ Davit deeh khrawm pui khawmuik hu ka veng Rabax, nawh puing mai pon rhim ka veng an.³⁰ Nawh peeik mhok khri simiang veng an khaing kaing nawh, mhok khri an cien tix talantan mai siang pa laohlie kawx koe ka mhok khri an mai kix ceep mhok khri an piang kaing Davit, nawh baox teei kraung pa rhim khaing daux veng an hoek tomnie.³¹ Nawh viex pui pa ot ka daux veng an khankix hu mai kieh kix yuh kaing leu khaox, kaing yuh kraung rhiem, kaing moe mai lailoh ti yuh kaing gleeing lon tiex, mawh kheu nan, nawh hoik kieh pui Amon pa ot ka daux veng daux yaong yuh awm in, khaix an Davit mai pui nawh khankix deeh ing ka veng Yerusalem heue.

13 **Grawng Amanon Mai Tama**
Abasalom kawn simex Davit, koe nan pa kied mhawm grang tix kaux, ceukaux nawh mawh Tama mai Amanon kawn simex Davit kied moh ka nawh.² Amanon saux kheu jao kied nie moh nawh nan tix Tama, Tama mawh bunkrih loig, nawh ang tawng ti keud pa sang yuh tix ka sibun an.³ Amanon koe paoxgrawm meed tix kaux pa kaux Yawnadat kawn simex Shima, puxke Davit, nawh mawh pui pa kied lhaklhiem tix kaux.⁴ Nawh chawk ah nin ka nawh, “Maix hoik mawh kawn simex simiang kheu jao pa yuh ka mawx maix lai dieh hu sipie tix ngaix hoik tix ngaix lie? Ang maix koe rhawm tix sang krai aux mhong lie?” mai Amanon deeh ah nin ka nawh, “Aux kied moh ka Tama nan puxke aux Abasalom.”⁵ Yawnadat deeh ah nin ka nawh, “Maix it piang ku it tix mai yuh tix awm pui saux, yam hoek keeing maix ti jhak maix,” maix ah nin ka nawh, “Kieh nan aux Tama hoek tawx aux ih priex mai kieh nawh mawh cao khrierien paih ka plak sivoe ngai aux dee pon aux tix yaox ka mai sonsang yaox aux tix ih pa khre nawh”⁶ Khaix an, Amanon it mai yuh ti awm grang pui saux, yam hoek simiang ti jhak ka nawh, Amanon ah nin ka simiang, “Yuh buanson kieh nan aux Tama hoek ti priexrien aux mai yuh blah khlawp ra khlawp son aux, kaplaksivoe ngai aux sonsangpon aux ti ih khaing daux taix nawh.”⁷ Davit ploi pui hu kok ka Tama ah nin, “Yam in hu ka nyiex puxke maix Amanon mai khrierien pa ih son nawh.”⁸ Mawh kheu nan, Tama hu ka nyiex puxke tix Amanon mai yaox kawn it nawh, khaix an Tama teei phawng gaox nghox ca mai kluklao tau mai yuh khlawp blah ka plak sivoe ngai Amanon mai ping sin ka ngu.⁹ Tama teei pan mai sau ti deuh blah ka plak sivoe Amanon, viang mawh nan nawh ang cu ti ih blah an, Amanon ah nin, “Kieh pui kukaux lih khaing dee ot aux?” mai pui lih khawmuik.¹⁰ Khaix an, Amanon ah nin ka Tama, “Viex pa ih pa yuh maix laig daux lawg plak daux, sonsang pon aux ti ih khaing daux taix maix” mai Tama teei khlawp blah pa hoik yuh tix mai viex laig daux lawg it puxke tix Amanon.¹¹ Yam viex Tama ti sang

tawx nawh ih, Amanon bluh taix nan tix ah nin ka nawh, "Nan aux eue, hoek ti it tau mai aux." ¹²Tama ah nin ka nawh, "Puxke aux eue, paw doh yuh pa khin ka aux liak, mawh kheu ang koe been ti yuh ceu in ka daux pui Isarelix, paw doh yuh ceu pa caoxcaig in liak. ¹³Aux sang pon deuh krax pa kaig tix dee mawx? Maix tak awm pui kua ka daux pui Isarelix, mawh kheu nan, kraigrawng in ka simiang, simiang tak ang teei aux hu khaing maix." ¹⁴Viang yuh ka mawx kawx nawh ang nghiet, mawh kheu hoik ting riang Amanon khaing nan tix, nawh yuh pa khin ka Tama mai it tau mai nawh. ¹⁵Khaix an, Amanon deeh koeng ka nan tix, pa koeng nawh ka Tama hoik nielheu khaing pa moh nawh glang ka an mai Amanon ah nin ka nawh, "Lih hu heue." ¹⁶Nan nawh deeh ah nin ka nawh, "Aux ang hu, pa grheu maix aux lih hu in, mawh pa nielheu caox khaing grawng pa hoik yuh maix ka aux," viang mawh nan, Amanon ang nghiet. ¹⁷Khaix an nawh kok siliex tix ah nin, "Grheu bun in lih khaing tin mai deeh song siviex khaix nawh." ¹⁸Tama ceep sibex pa koe pakpeung kuceu piang tokaux tix awm pa ceep kawm sibun simiang, siliex nawh hoik grheu nawh lih hu plak praix mai jhong siviex ka nawh. ¹⁹Tama sau nyaox piang kaing tix mai riah kraung ceep pa koe grang kuceu khaing piang tokaux tix mai deuh taix tix piang kaing tix, nawh ing mai yiiemyo tix. ²⁰Puxke nawh Abasalom ah nin ka nawh, "Mawh hoik ot puxke maix Amanon tau mai maix lie? Pux aux eue, ot yawg tix, kheu mawh nawh puxke maix, paw lai keud grawng in ka daux rhawm tix," mawh kheu nan, Tama ot yiienyawg daux nyiex puxke nawh Abasalom heue. ²¹Yam mhong simiang Davit ka grawng ankix nawh kied song rhawm kah. ²²Abasalom ang lai sikah lox mhawm lox caox ka puxke tix Amanon tix gum kawx, mawh kheu Abasalom kied koeng ka Amanon kheu nawh hoikyuh pa khinkan tix Tama heue.

Abasalom Pah Ka Amanon

²³Yam hoik naog ra num, Abasalom yuh krax khankheu pawie rhip hauk yung ka daux yaong Balaxhazaw pa koe hawt dex veng Epharim tan mai nawh ghaok cub kawm

kawm simex simiang hoek ti ih pawie tau mai tix tan khawmuik. ²⁴Abasalom hoek ka simiang Davit ah nin, "Yam in aux yuh krax khankheu pawie rhip hauk yung, yuh buanson kieh simiang mai siliex maix hoek ti ih pawie tau mai aux pa mawh siliex maix." ²⁵Simiang deeh ah nin ka Abasalom, "Kawm simex aux eue, ang mawh, paw kieh ex hu khawmuik, exlhat mawh beeh glawm cien ka son maix," simiang ang cuti hu mai nawh nawbuan piang nawh. ²⁶Abasalom deeh ah nin, "Phan ang mawh nan yuh buanson, kieh puxke aux Amanon hu tau mai yix" mai simiang deeh ah nin ka nawh, "Kheu jao grawng pa yuh ka mawx aux lai sang kieh nawh hu mai maix." ²⁷Mawh kheu Abasalom ca khioxkhaw ka nawh, Davit kieh Amanon mai cub kawm simex tix hu tau mai nawh khawmuik. ²⁸Abasalom tawm lox ka siliex tix ah nin, "Yam in pau ti jhak yam yoek Amanon ka rawm plix siiet, yam ah aux nin ka pex mug Amanon yum, khaix an pex mug nawh yum, paw lhat kah, hoik mawh aux pa tawx lox ka pex ang mawh lie? Teei riang pex mai kieh koe rhawm kua." ²⁹Siliex Abasalom khankix hoik yuh ceu an ka Amanon awm pa hoik tawm Abasalom ka kix, cub kawm simex simiang hoik prungprang mai tang yaog ti brug law cie tix to ing kukaux. ³⁰Yam kawm ot kix daux krax, pui tix kaux hoek kraigrawng an ka Davit "Abasalom hoik pah cub kawm simex simiang khankix yum, ang lai deuk tix kaux kawx." ³¹Simiang kaoh mai riah kraung ceep tix mai it piang tiex mai siliex nawh khankix kawx yuh awm an mai ot vungviang nawh. ³²Yawnadat kawm simex Shimi puxke Davit ah nin, "Paw kieh simiang aux yum rhawm ka lox kraig kix, hoik pah kix ka kawm simex simiang khankix! mawh ngie Amanon nongnong pa yum khaing, grawng in hoik mawh pa bak Abasalom daux rhawm tix, jah tom singaix lud Amanon ka nan nawh Tama. ³³Mawh kheu nan, paw kieh cao simiang aux keud ti laux rhawm ka yum cub kawm simex tix, mawh ngie Amanon pa yum."

Abasalom To Ka Veng Geshurax

³⁴Khaix an, Abasalom to mai pui awn ju, pui pa pau veng yaog ti jhak mai yaox hoek pui hawt

caong gawng plak khaix tix tomnie. ³⁵ Yawnadat deeh ah nin ka simiang, “Jhak heue, kawn simex simiang khankix hoik deeh hoek awm pa hoik krai siliex maix.” ³⁶ Khaix hoik krai nawh ceu an, dommawx doman kawn simex simiang khankix bleeh mai kix riagyo, simiang mai siliex nawh khankix kawx yiem sigrien sigre tau kukaux. ³⁷ Abasalom to ka Talamie kawn simex Amihut pa mawh simiang meung Geshurax, Davit kied khurphawm son kawn simex tix ku ngaix. ³⁸ Abasalom to ka veng Geshurax mai ot tan loe num. ³⁹ Simiang Davit hoik piawm ka grawng yum Amanon mai deeh biaong doe ka Abasalom heue.

14 Abasalom Deeh Ing Yerusalim

14 Yuabax kawn simex Zeruya tawng ka biaong rhawm simiang ka Abasalom. ² Yuabax ploi pui hu ka veng Tekaw mai kieh viex sibun tix kaux pa koe pingnya cuyi hoek khaing tan ah nin ka nawh, “Yuh grang maix awm pui khurphawm mai ceep kraung khirhawm son pui yum, paw kraix bee ka tokaux tix, yuh maix awm grang sibun khurphawm tom rheeng son pui yum. ³ Hu ah nin ka simiang awm lox pa tawm aux,” mawh kheu nan, Yuabax dha ti gau lox pa sang khaw nawh ti krai. ⁴ Yam hoek sibun veng Tekaw an ka simiang, nawh gup ngai tix piang tiex mai gruxgup ka nawh ah nin, “Simiang eue, Teem ka aux liak,” ⁵ khaix an simiang chawk nawh ah nin, “Koe ceu lo maix patix” mai nawh deeh ah nin, “Aux mawh miexmai pa hoik yum mex. ⁶ Siliex sibun maix koe kawn simex ra kaux kiex simah paox tix daux tiag, ang koe pui kieh ka kiex tix kaux kawx, tix kaux tom pah an tix kaux yum. ⁷ Jhak heue, paox nyiex aux hoikyuh see ka siliex sibun maix ah nin, deeh ap pui pa pah puxke tix yum, sonsang deeh pah yix nawh tang puxke nawh pa hoik pah nawh yum, yix tak yuh pui plud sinngao nawh lauxleeing, mawh kheu nan, kix tak sang preet gaox ngu pa kawn deuk ka aux mai ang lai kieh mex aux koe ceukaux mai ang lai kieh simie nawh deuk piang haktiex.” ⁸ Simiang deeh ah nin ka sibun an, “Deeh ing ka nyiex maix, aux tak prawngca ka son maix.” ⁹ Sibun veng Tekaw deeh ah nin ka simiang, 13:37 2Sa 3:3.

“Cao simiang aux eue, kieh phimap in koe piang aux mai piang paox nyiex aux khankix, paw kieh phimap koe piang simiang mai piang danggeung maix.” ¹⁰ Simiang ah nin, “Kok pui pa deuh phimap ka maix hoek ka aux mai nawh tak ang lai pon tuktiak ka maix tix bawg kawx.” ¹¹ Sibun an deeh ah nin, “Simiang eue, rawgbuan ka Simiang Siyiex mai paw tawx akhwang ka pui pa sang pawk bix nham ti yuh krax lauxleeing ka kawn simex aux, sonsang ang kix hoek ti yuh kawn simex aux lauxleeing, ” mai simiang ah nin, “Awm im ju Simiang Siyiex, hauk kaing kawn simex maix tak ang khrum piang tiex tix gawng kawx.” ¹² Khaix an, sibun an deeh ah nin, “Kieh siliex sibun maix deeh krai lox ka cao simiang liak,” maisimiang deeh ah nin, “Krai heue.” ¹³ Sibun an baiox ah nin, “Yuh patix maix lai keud ti yuh pui Siyiex lauxleeing? Mawh kheu lox krai maix ka simiang hoik awm deuh maix phimap ka tokaux tix kheu jao ang maix lai deeh kok ka pui pa hoik grheu maix to deeh hoek ka nyiex. ¹⁴ Ex tak mawh pa keung ti yum kukaux mai awm rawm pa hoik hieh piang tiex pa ang lai chix khrawm, viang Siyiex ang lai jhak pakngai pui kawx, Siyiex sawg daux krax son ang Nawh Cao tikvud ka pui pa hoik grheu Nawh khaing Tix. ¹⁵ Mawh kheu aux hoek ti krai grawng in ka cao simiang tix, jao ghat pui ka aux, aux pa mawh siliex tom hoek krai grawng in ka maix simiang, aux keud maix simiang pon yuh in awm pa khioxxhaw aux ka maix. ¹⁶ Mawh kheu maix simiang tak nghiet mai taoh aux pa mawh siliex sibun maix mai kawn simex aux lawdluan khaing pui pa sang yuh aux lauxleeing khaing sinngao Siyiex. ¹⁷ Siliex sibun maix keud yuh nin, gumlox cao simiang aux, kieh rhawm aux nyawm, mawh kheu cao simiang aux hoik tawng ti goih ceu pa mhawm mai pa caox awm siliex Simiang Siyiex mai kieh Simiang Siyiex maix tak ot tau mai maix.” ¹⁸ Simiang pawk ah nin ka sibun an, “Paw lai mox can pa chawk aux ka maix tix ceu kawx” mai sibun an ah nin, “Kieh cao simiang aux krai pa sang chawk tix khankix.” ¹⁹ Simiang ah nin, “In khankix

mawh pa kaoh khaing rhawm keud Yuabax lie?" Sibun an deeh pawk ah nin, "Awm im ju maix, cao simiang aux eue, pui tix kaux kawx tak ang pon via tix goix dawm khaing gumlox cao simiang aux tix kaux kawx, mawh siliex maix Yuabax pa hoik tawm hoik gau aux ka lox inkix khawmuik sonsang krai siliex sibun maix kah. ²⁰ Sonsang tiehloh tix grawng ceu in, mawh siliex maix Yuabax pa gau khawmuik, simiang aux mawh pa koe pingnya cuyi, awm koe pingnya cuyi siliex Siyiex mai chix tawng ka pa koe piang haktiex khawmuik." ²¹ Simiang deeh ah nin ka Yuabax, "Jhak heue, aux hoik tat grawng in, deeh hu kok pui awn ju Abasalom hoek." ²² Yuabax gup ngai tix piang tiex mai gruxgup ka nawh mai ah lox ting buanson ka simiang, "Cao aux mai cao simiang aux eue, in singaix siliex maix hoik tawng ka pon tix buanson ka sivoe ngai maix, kheu hoik yuh maix can pa khiokhaw siliex tix grum naog." ²³ Mawh kheu nan, Yuabax kaoh mai hu ka veng Geshurax mai deeh viex Abasalom hoek ka veng Yerusalim. ²⁴ Simiang ah nin, "Kieh nawh deeh hoek ka nyiex tix, paw kieh nawh yaox ka pakngai aux," mawh kheu nan, Abasalom deeh hoek ka nyiex tix mai nawh ang pon ti yaox ka pakngai simiang.

Davit Ploi Phimap Abasalom

²⁵ Ka daux pui Isarelix, pui pa mhawm grang mai pa yaogyaw pui ang koe tix kaux kawx awm Abasalom, jah ka caong tom hoek ka kaing, ang koe dee ne tix ceu kawx. ²⁶ Kheu jao ciien hauk kaing nawh, nawh rhip hauk kaing tix tix num tix bawg yam sidah num, yam rhip nawh hauk tix, krax ciien hauk nawh koe ra yieh shekhe. ²⁷ Abasalom koe kawm simex loe kaux mai kawm sibun tix kaux, ceukaux nawh mawh Tama, nawh mawh sibun pa kied mhawm grang pakpeung tix kaux. ²⁸ Abasalom ot ka daux veng Yerusalim ra num, viang mawh nan, nawh ang bax yaox pakngai simiang. ²⁹ Mawh kheu nan, Abasalom kok Yuabax, sonsang ploi nawh hu ka simiang, viang mawh nan, nawh ang cu tix hoek, nawh deeh baoux ploi pui hu kok ra bawg tix bawg kawx, ang cu tix hoek. ³⁰ Nawh deeh ah nin ka siliex tix khankix, "Jhak heue, kaung cie Yuabax koe dexkaung

aux mai koe nghox koi, hu mai keeig an ka ngu " mai siliex Abasalom hu keeig kaung Yuabax ka ngu. ³¹ Khaix an, Yuabax yaog ti kaoh mai hu ka daux nyiex Abasalom ah nin, yuh ka mawx "Siliex maix lai keeig kaung aux ka ngu kheu patix? ³² Abasalom deeh pawk ah nin ka Yuabax, "Jhak heue, aux hoik ploi pui hu kok maix hoek tin sonsang kieh maix hu krai ah nin ka simiang, "Maix hoik kieh aux hoek khaing veng Geshurax kheu jao patix, ot aux tan lheu mhawm son aux, mawh kheu nan yam in, kieh aux yaox pakngai simiang, phan aux koe phimap tix ceuceu kieh nawh pah ka aux." ³³ Mawh kheu nan, Yuabax lih hu ka simiang mai krai grawng ankix ka nawh mai yam kok nawh Abasalom hoek ka simiang, nawh hoik gup pakngai tix piang tiex sivoe simiang mai simiang ngheet ka Abasalom heue.

15 Grawng Tiehfeen Abasalom

¹⁵ Khaix hoik ceu ankix, Abasalom khrierien linglawx brung mai brung khankix mai pui tix phuan kaux pa to hu sivoe nawh. ² Abasalom kaoh caocao mai cung hawt diang siviex, yam pui tix kaux hoek sonsang kieh simiang prawngsee tix, Abasalom kok pui an hoek ka tix ah nin, "Mawh kaoh maix khaing veng mawx?" Nawh deeh pawk ah nin, "Siliex maix mawh doeh nyiexma pui Isarelix." ³ Abasalom deeh ah nin ka nawh "Jhak heue, grawng see maix mawh pa mhawm mai pa khawcaw, viang mawh nan, pui pa hoik laug simiang sonsang prawngsee maix ang koe tix kaux kawx." ⁴ Lheu khaing an, Abasalom baoux ah nin, "Phan aux yaox ti mawh cao prawngsee daux haktiex in, pui pa koe grawng see kuceu khankix nawh tak hoek ka aux mai aux tak prawng rahsee ka son nawh." ⁵ Yam hoek tix kaux kaux dex nawh, sonsang hoek gruxgup ka nawh, nawh nyeu taix ti lih giex nawh mai ngheet kah. ⁶ Ka daux pa yuh nin, Abasalom hoik pon priex rhawm ka pui Isarelix khawmuik, pa sang hoek prawngsee tix ka simiang. ⁷ Khaix hoik luan pon num, Abasalom ah nin ka simiang, "Kieh aux hu ka veng Hebron, sonsang deeh cox aux lox sijax

pa hoik yuh tix ka Simiang Siyiex. ⁸Yam kawn ot aux ka veng Geshurax ka daux haktiex Shurix, mawh kheu siliex maix hoik dawg yuh ti deuh lox sijax tix ceu pa ah nin, phan Simiang Siyiex deeh viex aux hoek ka veng Yerusaliem tete, aux tak yuh kaing jhaw son Simiang Siyiex” ⁹ Simiang deeh ah nin ka nawh, “Hu ka daux pa nhim,” mawh kheu nan, nawh yaog ti kaoh mai lih hu ka veng Hebron. ¹⁰Viang mawh nan, Abasalom ploï pui hu jiang can dee ot doehru pui Isarelix khawmuik ah nin, “Yam mhong pex lox teettawng dommax doman, pex ah nin, “Abasalom kuang ka daux veng Hebron” ¹¹ Abasalom mai pui ra yieh kaux pa hoik ghaok lih hu khaing veng Yerusaliem tau mai nawh, kix hu khawm rhawm rah rhawm see tix mai pa ang tix tawng tittix. ¹² Khaix an, Abasalom kok ka Ahitawphelax pui Gilaw cao pa tawx krax keud ka Davit pa ot daux veng Gilaw, yam kawn tan nawh krax tan pa appong, pui pa deeh tiehfeen khankix niied ti ting riang mai pui Abasalom kawx, niied ti baox haohhun sinyek sanyek.

To Davit Khaing Yerusaliem

¹³Pui viex satang tix kaux hoek ka Davit ah nin, “Rhawmrhi pui Isarelix khankix hoik hawt hu tau mai Abasalom.” ¹⁴ Mawh kheu an, Davit ah nin ka siliex tix pa ot tau mai nawh ka daux veng Yerusaliem, “Yaog ti kaoh mai kieh ex to, niied yuh phaiphai, phan ang mawh nan, ex ang lai bhoek khaing Abasalom, phan ang yuh nan, aux lhat nawh krup ex mai viex pa lauxleeing hoek piang ex mai yuh veng in lauxleeing ka lawm vaid.” ¹⁵ Siliex simiang khankix deeh ah nin ka nawh, “Yix pa mawh siliex maix tak yuh awm pa tat maix daux rhawm tix.” ¹⁶ Simiang lih hu tau mai pui daux nyiex haw tix khawmuik, viang mawh nan, simiang prah moeng iak tix kao kaux sonsang priex nyiex haw khaix tix. ¹⁷ Simiang lih hu tau mai pui tix khawmuik mai hu bang plak praix veng ka yaong Petham. ¹⁸ Khaix an, siliex nawh khankix hu ka plak sivoe nawh mai pui Kheretix pui Peletix, pui Gitix khawmuik pa hawt khaix nawh koe

15:28 Yaog 63 Title.

liah yieh kaux khaing daux veng Gata, hu ka plak sivoe nawh. ¹⁹ Simiang deeh ah nin ka Itie pui Gitix, “Maix lai hawt hu tau mai yix kheu jao patix, deeh ing ot tau mai simiang khraox, mawh kheu mawh maix pui tang meung mai mawh nyosinie pa ang koe dee ot. ²⁰ Phan ah tete maix taug hoek ngie kawxkawx, daux singaix aux sang pon kieh maix lailing hu jee hu blaong tau mai yix yuh ka mawx, mawh kheu ang aux nyang bax tawng dee sang hu tix, deeh ing mai viex puxaik maix khankix ing, kieh pa cauxrhawm mai pa mawhmeh koe tau mai maix.” ²¹ Itie deeh pawk lox simiang ah nin, “Awm im ju Simiang Siyiex mai awm im ju cao simiang aux, can dee ot cao simiang aux dee mawx angah, yum angah, im angah, siliex maix tak ot tan.” ²² Mawh kheu nan, Davit deeh ah nin ka Itie, “Hu sivoe heue.” Khaix an Itie pui Gitix mai pui nawh khankix khawm kawn pa iak pa ting yaog ti hu sivoe. ²³ Pui haktiex khankix yiem sigrien sigre mai pui pa hu tau mai nawh khankix yaog ti hu, tokaux simiang tiang rawm klawng Kidaron mai pui khankix tiang ti hu ka daux tiag khawmuik. ²⁴ Zadok mai pui Lewix pa ot tau mai nawh khawmuik kawx, klawm teug buan Siyiex hoek mai kix tah ti deuh teug buan sija mukheu Siyiex tan mai Abiatha yuh krax tan tom hoik lih hu pui khankix khaing daux veng. ²⁵ Khaix an simiang ah nin ka Zadok, “Deeh yaog ti klawm teug buan Siyiex ing ka daux veng, phan aux pon buanson krax pa cauxrhawm plak sivoe ngai Simiang Siyiex, Nawh Cao tak deeh teei aux ing mai Nawh Cao tak jhi aux yaox teug buan in khawm dee ot Nawh Cao.” ²⁶ Viang mawh nan, phan Nawh Cao ah nin, “Aux ang khawrhawm ka maix, mawh kheu nan, aux tak ot tin, kieh Nawh Cao yuh awm pa koe alo tix piangaux.” ²⁷ Nawh deeh ah nin ka cao giex kaing li Zadok, “Ang maix mawh pui pa grux yaox lie? Deeh ing daux veng daux pa nhim tau mai kawn simex maix ra kaux pa mawh Ahimat pa mawh kawn simex maix mai Yawnasan pa mawh kawn simex Abiatha. ²⁸ Jhak heue, Aux tak pau maix ka daux lung daux tiag tom hoek bawgyam deeh mhong aux lox tix ceuceu khaing maix.” ²⁹ Mawh

kheu nan, Zadok mai Abiatha deeh yaog tix klawm teug buan Siyie x ing ka veng Yerusalie m mai kix ot tan. ³⁰ Khaix an, Davit tawb kaing tix mai peeik kie p tix piang gawng Sanlon mai yiem mai can pui pa ot tau mai nawh khankix kawx tawb kaing tix kukaux mai haok piang gawng tau mai pa yiemyo tix. ³¹ Yam an pui tix kaux hoek kra i Davit mhong ah nin, "Ahitawphelax ot ka sinax pui tiehfeen tau mai Abasalom" mai Davit ah nin, "O Simiang Siyie x eue, aux rawgbuan ka Maix Cao, kieh krax keud Ahitawphelax mawh pa giexgoing." ³² Yam hoek Davit piang choek gawng ka dee krub nawh ka Siyie x tan, jhak heue, Hushie pa mawh pui veng Akhit hoik hoek ti rieb nawh tau mai riah sibex tix mai sau phawng tie x piang kaing tix. ³³ Davit ah nin, "Phan maix hu tau mai aux, tak mawh beeh glawm ci en ka aux. ³⁴ Mawh kheu nan maix deeh ing ka dau x veng ah nin ka Abasalom, simiang eue, aux tak mawh siliex maix, awm hoik sax mawh aux siliex keeing maix glang ka singaix pa hoik luan, khaix an maix tak pon yuh krax keud Ahitawphelax lauxleeing ka sonaux."³⁵Zadok mai Abiatha cao giexkaing li kawx ot tau mai maix tan ang mawh lie? Canceu pa mhong maix khaing dau x nyie x simiang maix tak kra i Zadok mai Abiatha. ³⁶Kawn simex Zadok pa mawh Ahimat mai kawn simex Abiatha Yawnasan kawx hoik ot tau mai kix tan, can pa mhong maix kuceu maix tak kieh kie x deeh hoek ti kra i ka aux." ³⁷ Mawh kheu nan, Hushie pao xgrawm Davit deeh ing ka dau x veng mai Abasalom kawx laig dau x veng Yerusalie m yam an heue.

16 *Siliex Mephibawshiet*

Yam hoik luan Davit khaing choek gawng ceex, Zibax siliex Mephibawshiet hoek rieb nawh tau mai la ra mu pa viex lhang mai nawh tang khlawp blah ra yieh khlawp mai sigleem plix siiet kroh tixyieh sigleem mai khlawp plix ruh tixyieh khlawp mai si ngi en hak rawm plix siiet tix mu. ² Simiang ah nin ka Zibax, "Mawh sang viex maix ti yuh patix ka in?" Zibax deeh ah nin, "La in kie x mawh sonsang brug pao x nyie x simiang, khlawp blah plix ruh mawh sonsang 16:1 2Sa 9:9-10.

ih pui awn ju khankix mai rawm plix siiet mawh sonsang nyaux pui pa taugmao ka dau x ti ag." ³ Simiang deeh ah nin, "Mawh ot cub kawn simex cao simiang maix dee mawx?" Zibax pawk lox ah nin, "Nawh ot ka dau x veng Yerusalie m, mawh kheu nawh ah nin, dau x in singaix doeh nyie xma pui Isarelax tak deeh tawx meung haktie x keeing aux ka aux" ⁴ Mawh kheu nan, simiang deeh ah nin ka Zibax, "Mawh heue, kraung khrai cie Mephibawshiet khawmuik tak mawh cie maix " mai Zibax deeh ah nin, "Cao simiang aux eue, aux hoek krub ka plak sivo e maix, dau x pa viex tix rhawm awn rhawm ti em, sonsang pon aux buanson pa cauxrhawm plak sivo e maix."

Shimi Jhaxlawg Ka Davit

⁵ Yam hoek simiang Davit ka veng Bahurim, pui tix kaux khaing doeh nyie xma Sawlux, pa kaux Shimi kawn simex Gerax lih hoek khaing tan tau mai lox pa jhaxlawg ang judjai. ⁶ Khuang Davit mai siliex nawh khankix ka simao x, pui khankix ot plak dawm mai plak goix simiang khawm ra plak. ⁷ Shimi jhaxlawg ah nin, "Maix mawh pa kieh nham pui jah mai mawh pui caox lih hu heue, lih hu heue." ⁸ Simiang Siyie x hoik viex nham phimap doeh nyie xma Sawlux hoek piang maix ka dee pa hoik plud maix ti kuang mai Simiang Siyie x deeh ap meung haktie x in dau x tawm taix kawn simex maix Abasalom, mawh kheu mawh maix pa kieh nham pui jah, ceu pa lauxleeing hoik hoek piang maix." ⁹ Abishie kawn simex Zeruya ah nin ka Davit, "Jao pa yuh ka mawx maix lai kieh so x yum an jhaxlawg ka tix?, kieh aux hu kid ti tei kaing nawh." ¹⁰ Simiang deeh ah nin, "Kawn simex Zeruya khankie x eue, mawh dexdawd pax mai aux ka ceu patix?, kieh nawh jhaxlawg heue, phan mawh Simiang Siyie x pa ah nin ka nawh, jhaxlawg ka Davit, mawh pui mawx pa sang pon ah nin, maix hoik yuh ceu ankix kheu jao patix?" ¹¹ Davit deeh ah nin ka Abashie mai siliex nawh khawmuik, "Jhak heue, kawn simex cao aux hoik sawg ka ju aux, pui Benyamin in tak sang nielheu pon yuh ceu in miexding, graham nawh, kieh nawh jhaxlawg heue, mawh

kheu Simiang Siyiex hoik tawm gumlox tix ka nawh.”¹² Kheu pa jhaxlawg in singaix, ha mawh Simiang Siyiex pa sang kiangien piang pa khawrhawm aux kah mai tak deeh tawx pa mhawm ka aux pleue.”¹³ Yam lih Davit krax tau mai pui nawh khankix khaing tan, Shimi hawt khaix kix ka praok gawng plak sivoie nawh mai baoux jhaxlawg nawh mai khuang nawh ka lon simaox mai rhuat phawng tiex piang nawh.¹⁴ Yam bleeh simiang mai pui pa hu tau mai nawh ka veng Bahurim, kix kied taug mao mai lauxlee tix tan heue.

Krax Keud Pa Tawx Ahitawphelax

¹⁵Yam hoek Abasalom mai pui nawh khawmuik ka veng Yerusaliem mai Ahitawphelax kawx hoek tau mai kix.¹⁶ Yam hoek Hushie pui Akhix paouxgrawm Davit ka Abasalom mai Hushie ah nin ka Abasalom, “Kieh simiang langju, kieh simiang langju.”¹⁷ Abasalom ah nin ka Hushie, “In mawh lox sijax pa yuh maix piang paouxgrawm tix lie? Kheu jao patix maix laix ang hu tau mai paouxgrawm tix.”¹⁸ Mai Hushie deeh ah nin ka Abasalom, “Ang mawh, aux tak ot tau mai pui pa hoik laug Simiang Siyiex mai pui pa hoik laug pui Isarelix khawmuik mai aux tak ot mai nawh.¹⁹ Lheu khaing an, aux tak sang yuh kaing jhaw pui mawx? Mawh ang aux caw ti yuh kaing ka son kawn simex nawh lie? Awm hoik yuh aux kaing plak sivoie keeing maix mawh kheu nan, aux tak yuh kaing ka plak sivoie ngai maix.”²⁰ Khaix an Abasalom ah nin ka Ahitawphelax, “Sang caw aux ti yuh ka mawx, tawx krax keud liak.”²¹ Ahitawphelax deeh ah nin ka Abasalom “Hu laig ka daux dee ot moeng iak keeing maix khankix pa hoik prah nawh kix mawh cao pau nyiex haw, yam mhong pui Isarelix khawmuik ka yuh maix pa seeing brai keeing tix kah, khawn taix pui pa ot plak maix tak nie koe riang rao kah.”²² Mawh kheu nan, kix sum nyiex gox tix lhang ka son Abasalom piang choek nyiex haw mai Abasalom hu laig dee ot moeng iak keeing tix ka plak sivoie ngai pui Isarelix khankix.²³ Mai krax keud pa tawx Ahitawphelax hoik deeh awm lox pa chawk pui ka Siyiex, mawh kheu nan, Davit mai

16:22 2Sa 12:11-12.

Abasalom hoik priex ti hawt krax keud patawx Ahitawphelax mhawm mhawm heue.

17 Ahitawphelax Mai Hushie

¹Khaix an Ahitawphelax baoux ah nin ka Abasalom, “Kieh aux laug pui tix mheen ra rheng kaux mai aux tak yaog ti hawt khaix Davit daux sawm in.”² Aux tak krup yam kawn taug mao nawh mai yam iak riang nawh mai yuh nawh lhatgraung mai pui pa ot tau mai nawh tak to khawmuik mai aux tak pah ngie ka simiang.³ Aux tak deeh viex pui khawmuik hoek ka maix, yam pon ex pui pa sawg maix cao simiang tix kaux an, awm hoik pon ex pui deeh hoek khawmuik, khaix an pui khawmuik tak koe krax payienyawg.⁴ Gumlox an hoik mawh pa khawrhawm Abasalom mai khawm kuad riex ju pui Isarelix kah.

Grawng Pa Keud Hushie

⁵Yam an Abasalom ah nin, “Kok ka Hushie pui Akhix hoek yam in, kieh ex nghiex ceu pa sang kraik nawh.”⁶ Yam hoik hoek Hushie ka Abasalom, nawh ah nin, “Ahitawphelax hoik tawx krax keud yuh nin, mawh sang yuh ex awm pa kraik nawh lie? Phan ang mawh nan, kraik cie maix.”⁷ Hushie deeh pawk ah nin ka Abasalom, “Krax keud pa tawx Ahitawphelax bawg in ang mawh pa mhawm.”⁸ Hushie deeh ah nin “Maix hoik tawng grawng keeing tix mai pui nawh khankix mawh pa kied ting riang rao mai kix kied songrhawm awm krih pa hoik graik kawn ka daux tiag, keeing maix mawh pui payuh naing tix kaux mai ang sax pan sax it daux sinax pui khankix.”⁹ Yam in, nawh kawn mox tix ka daux tiex, phan ang mawh nan, nawh tak mox tix tangdah, yam yum pui khankix tixblah phaoka, can pui pa mhong ka grawng ceu an tak ah nin, pui pa hawt khaix Abasalom hoik somnai.¹⁰ Pie pui pa koe rhawm vao rhawm kua ang ah mai pa koe rhawm awm rhawm sivai sangsi kawx tak lhatgraung, mawh kheu pui Isarelix khawmuik tawng ka mawh keeing maix pui pa kied ting riang rao mai pui pa ot tau mai nawh khankix kawx mawh pa koe rhawm vao rhawm kua.¹¹ Mawh kheu nan, aux tawx krax keud ka maix, pui Isarelix khawmuik hoek ka maix jah ka veng Dan tom hoek ka

veng Berashibax, kieh haohhun awm mhaik praokrawm sigrit sigra, tokaux cao maix kawx, caw ti hu ka daux naing. ¹²Mawh kheu nan, ex tak krup nawh tix dahdah ka dee sang pon ex ti yaox nawh mai ex tak yuh naing ceep ka nawh awm jah rawm ciex piang tiex, tokaux cao nawh mai pui pa ot tau mai nawh tak ang lai deuk tix kaux kawx. ¹³Phan nawh phrut ti laig ka daux veng tix veng, pui Isarelux khankix tak viex maox hoek ka daux veng an mai ex tak sileed ka veng an laig ka daux rawm klawng tom ang lon simaiox lai deuk pie tix lon kawx khaing tan.” ¹⁴Abasalom mai pui Isarelux khawmuik ah nin, “Krax keud sawn pa tawx Hushie pui Akhix lheu mhawm khaing krax keud Ahitawphelax, mawh kheu Simiang Siyiex sang kieh krax lauxleeng hoek piang Abasalom mai yuh krax keud pa tawx Ahitawphelax mawh pa somnai.”

Hushie Tawx Satix Ka Davit

¹⁵Hushie ah nin ka Zadok mai Abiatha cao giex kaing li, “Ahitawphelax hoik tawx krax keud ka Abasalom mai ka kuad song pui Isarelux, awm an aux deeh baiox tawx krax keud ka nawh. ¹⁶Mawh kheu nan, niied ploi pui hu kraik ka Davit ah nin, daux sawm in paw lai ot daux lung daux tiag, niied ti to hu ka plak toi an, phan ang mawh nan, simiang mai khawm pui pa ot tau mai nawh, krax yum tak bleet ka kix khawmuik” ¹⁷Yawnasan mai Ahimat ot ka daux yaong Enrawgelax, kheu ang rhawm kieh pui yaox yam laig tix daux veng, mawh kheu nan, siliex sibun tix kaux hoek ti kraik grawng kuceu ka kix mai kix deeh kraik lox an ka Davit. ¹⁸Viang mawh nan, kawn nyawm tix kaux hoik yaox ka kiex mai nawh deeh hu kraik grawng an ka Abasalom, kiex khawm ra niied ti hu khaing tan mai hoek ka veng Bahurim daux nyiex pui pa koe rawm daux ka brawk nyiex mai kiex laig mox tix daux rawm daux an. ¹⁹Sibun cao nyiex teei dawb tawb mai tawb piang moing rawm daux mai nawh hok nghox ka piang an, ang koe pui tawng tix kaux kawx. ²⁰Yam hoek siliex Abasalom ka daux nyiex sibun ankix ah nin, “Ot Ahimat mai Yawnasan dee mawx, Sibun an deeh ah nin ka kix, “Kiex hoik tiang toi klawng, yam sawg kix ka kiex mai

ang yaox, kix deeh ing ka veng Yerusalieim.” ²¹Khaix hoik lih hu kix khaing tan, Ahimat mai Yawnasan deeh lih khaing daux rawm daux mai kiex hu kraik grawng an ka simiang Davit ah nin, “Yaog ti kaoh mai niied tix tiang plak toi rawm, mawh kheu Ahitawphelax hoik tawx krax keud pa deeh tiehfeen ka son maix.” ²²Mawh kheu nan, Davit mai pui nawh khawmuik, yaog ti kaoh mai tiang hu toi rawm klawng Yawdan mai yam hoik bah rieng praix pongawb, pui pa ang nyang bax tiang toi rawm klawng Yawdan, ang lai deuk tix kaux kawx. ²³Yam hoik yaox Ahitawphelax ka ang kix lai hawt ti yuh awm krax keud pa hoik tawx tix, nawh sau an brug tix piang la mai yaog ti ing ka daux veng ot tix ka nyiex tix, khaix hoik khrierien nawh kuceu son pui daux nyiexma tix mai nawh rawd ngawg ti yum ka maox mai kix sipaung nawh ka daux simeeig keeing nawh. ²⁴Yam bleeh Davit ka veng Mahanem, Abasalom tau mai Isarelux kawx tiang hu plak toi rawm klawng Yawdan. ²⁵Abasalom yaog Amasa plud tix mawh cao kaing naing ting daux cubkrunaing nawh tang Yuabax, Amasa mawh kawn simex Yetara pui Ishamelax pa hoik teei ti moeng Abigelax, kawn sibun Nahat puxo Zeruya miex Yuabax. ²⁶Mawh kheu nan, pui Isarelux mai Abasalom hoik bang ti ot ka daux haktiex Gilat. ²⁷Yam bleeh Davit ka veng Mahanem, Shawbi kawn simex Nahat pui veng Rabax pui Amon mai Makhirax kawn simex Amelax pui veng Lawdebax mai Bazilie pui Gilat khaing veng Rawgelim khankix, ²⁸hoik viex kraung it, pan khoek, aw tiex, gaiox, nghox ca, gaiox nghox koi, phawng blah, siyawng diag, ceem, ceem raoh mai canceu pa diag khankix. ²⁹Viex rawm hia mai klon bee rawm teeih, yung mai kang rawm teeih, hoek ka Davit mai pui pa ot tau mai nawh ih ka mai kix ah nin, “Pui khankix hoik cairhawm mai hoik taug mao mai sang nyaux nie rawm ka daux tiag heue.”

18 ***Grawng Yum Abasalom***
Davit simin pui pa ot tau mai tix mai yaog cao kaing naing khankix pa kuang piang pui tix rheng kaux mai cao kaing naing piang pui tix yieh kaux. ²Khaix an Davit ploik cub pui khankix lih hu loe cub, tix cub ot

greem Yuabax mai an tix cub ot greem Abashie kawn simex Zeruya pux Yuabax mai tix cub ot greem Itie ceu pui Gitix mai simiangah nin ka pui khankix, "Tokaux aux tak hu tau mai pex." ³Viang mawh nan cub pui hun deeh ah nin, "Tokaux cao maix tak ang pon ti lih hu, mawh kheu phan yix yaox ti to, kix ang deuh yix koe ceu mai phan yix yum tix plak kawx, kix ang nyang deuh koe ceu, viang mawh nan, tokaux maix nielheu ngawh khaing yix tix mheen kaux, mawh kheu nan, phan maix ot ka daux veng khaix yix mai tawx krax teem ka son yix lheu mhawm." ⁴Simiang deeh ah nin ka kix, "Can pa yaox pex mawh pa mhawm, aux tak hawt ti yuh, "mawh kheu nan, simiang cung praok siviex veng mai cub pui kaing yieh mai cub pui kaing rheng li hu." ⁵Simiang tawm lox ka Yuabax, Abishie mai Itie ah nin, "Viex rhawm awn ka kawn simex aux Abasalom tau mai pa jhak tix pakngai aux. "Pui khankix mhong yam tawm simiang lox ka cub cao kaing naing khankix, son grawng Abasalom. ⁶Pui khankix lih hu sonsang puing naing ka pui Isarelaux mai kix sipub ti puing paox tix ka daux tiag Epharim. ⁷Pui Isarelaux khankix hoik som ka plak sivoie siliex Davit, krax pa pah yum hoik kied ting ka daux singaix an mai can pui pa yum baoh tan koe ra mheen kaux. ⁸Naing hoik tah hu ka baoh haktiex an ku daogdawn, pui pa yum daux tiag singaix an nielheu khaing pui pa yum ka lawm vaid khankix. ⁹Abasalom sipub ka cub siliex Davit, yam an Abasalom brug law cie tix to mai law an laig ka greem kak khaox tiah ting mai kaing nawh sighthap tix sinax kak khaox, khaix hoik to law brug nawh khaing nawh, nawh takteue tix dee lhaong tan. ¹⁰Pui tix kaux hoek ti yaox ka nawh mai deeh hu kraik ka Yuabax ah nin, "Aux taug yaox Abasalom takteue tix piang khaox tiah ting tan." ¹¹Yuabax ah nin ka pui pa hoek ti kraik an ka nawh, "Mawh rug yaox maix nawh tete lie? yuh ka mawx maix lai ang blung nawh cod piang tiex, phan maix yuh nan, aux tak sang tawx maix cie mau kao shekhe mai maox rawd nyoi." ¹²Pui an deeh ah nin ka Yuabax, "Viang aux yaox ti rieb mau tix rheng shekhe khaing daux taix maix kawx, aux

tak ang pon tawx taix tix ka kawn simex simiang, mawh kheu hoik mhongex lox tawm simiang ka maix mai ka Abishie mai Itie ah nin, jhak ka pakngai aux mai priexrien ka kawn simex aux Abasalom awx, ¹³phan ang mawh nan, aux tak awm pui tawb kheem mai hoek krax som ju, mawh kheu ceu pa glip khaing simiang ang koe tix ceu kawx maix mai aux kawx tak mawh pui koeng ka paox tix." ¹⁴Yuabax ah nin, "Aux ang lai gla bawgyam tom rheeng tau mai maix" mai nawh teei pliah loe giang mai hu blung sokrhawm Abasalom sinax kak khaox tiah yam kawn im nawh. ¹⁵Pui awn ju kao kaux pa klawm kraung naing ceep Yuabax khankix, rawb vungviang ka Abasalom mai pah nawh yum. ¹⁶Yuabax phlu teettawng mai tiebtie ka kix, mawh kheu nan, pui naing deeh ing khaing dee hawt pheet tix pui Isarelaux. ¹⁷Mai kix teei tokaux yum Abasalom, hu tik ka daux o pa ting, pa koe ka daux nong mai pum simaox piang simeeig nawh, pui Isarelaux kawx deeh to ti ing ka nyiex tix kukaux. ¹⁸Yam kawn im ju Abasalom, nawh sum rong simaox tix mu son tokaux tix ka daux ngawd simiang tan, mawh kheu nawh hoik ah nin, "Aux ang koe kawn simex tix kaux kawx sonsang plud tix dohkeud ka aux," nawh kok rong simaox an awm ceukaux tix, tom hoek in singaix hoik kok mawh rong simaox Abasalom heue.

Davit Mhong Yum Abasalom

¹⁹Ahimat kawn simex Zadok ah nin, "Kieh aux to ti ing kraik ka simiang, grawng hoik pawk Simiang Siyiex bix ka pui koeng nawh khankix." ²⁰Yuabax deeh ah nin ka nawh, "Maix ang pon ti viex satang in ing daux in singaix, kheu jao mawh ngaix yum kawn simiang, viang mawh nan maix tak pon ti viex grawng satang in singaix tang ngaix." ²¹Yuabax ah nin ka Kushi, "Hu heue, ing kraik grawng pa hoik yaox maix ka simiang" mai Kushi ngeuh kaing tix ka Yuabax mai to hu. ²²Ahimat kawn simex Zadok baoh ah nin ka Yuabax, "Viang yuh ka mawx kawx, kieh aux baoh to hawt khaix Kushi," Yuabax ah nin, "Kawn simex eue maix ang tie koe satang grawng pa koe buanson ti sang kraik maix lai sang to tau mai nawh yuh ka mawx?" ²³Ahimat ah nin,

“Viang yuh ka mawx kawx, ca kieh aux to hu liak,” Yuabax ah nin ka nawh, “To ti hu heue, ” khaix an Ahimat kawx to ti hu krax daux lung mai luan khaing Kushi. ²⁴ Davit ngawm sinax diang siviex veng ra mu mai cao pau veng haok piang braux nyiex pau veng piang guh veng, yam yaog nawh ti jhak nawh yaox ka to pui tix hoek tix kaux. ²⁵ Cao pau veng yo mai kraik ka simiang mai simiang ah nin, “Phan nawh mawh tix kaux khaing nawh tee mawh pa viex grawng satang tix ceuceu,” nawh hoik nie hoek dex phao. ²⁶ Khaix an, cao pau veng baox yaox ka to pui tang kaux tix kaux ti hoek mai cao pau veng yo ti kraik ka cao pau siviex veng ah nin, “Pui tang kaux tix kaux baox to tix hoek” mai simiang deeh ah nin, “Nawh kawx baox mawh pa viex satang hoek.” ²⁷ Pui pau veng an ah nin, “Aux keud pui pa to tix hoek phao voe an sang mawh Ahimat kawm simex Zadok” mai simiang ah nin, “Nawh mawh pui mhawm mai nawh tak hoek tau mai grawng lox satang ceu pa mhawm khankix.” ²⁸ Mai Ahimat kokyo ah nin ka simiang, “Kieh nyawm ot,” khaix nawh gup pakngai tix piang tiex plak sivoe simiang ah nin, “Kieh pa yaogyaw buanson koe ka Simiang Siviex maix, pa hoik ap pui pa yaog plawng taix tix ka maix mai pa tiehfeen ka simiang aux.” ²⁹ Simiang ah nin, “Mawh kawm klawd kawm simex awn ju aux Abasalom nang lie?” Ahimat deeh pawk ah nin, “Yam ploie cao kaing naing Yuabax aux hoek ka maix, aux yaox sinum lawh lox pa kied ting, viang mawh nan, aux ang kriem tawng mawh grawng ceu patix.” ³⁰ Simiang deeh ah nin, “Greed maix cung ti ot tin” mai nawh greed tix cung tan. ³¹ Khaix an tivud Kushi hoek bleeh ah nin, “Cao Simiang aux eue, koe satang ceu pa mhawm, mawh kheu Simiang Siviex hoik pawk bix maix ka daux singaix in ka pui khankix pa yaog ti kaoh mai tiehfeen ka maix.” ³² Simiang ah nin ka Kushi, “Mawh kawm klawd ju kawm simex awn ju aux Abasalom nang lie?” Kushi pawk ah nin, “Kieh pui koeng cao simiang aux khankix mai can pui pa yaog ti kaoh tiehfeen mai pa yuh krax kharhawm ka maix, awm pa yaox kawm nyawm simex awn ju maix.” ³³ Khaix an,

simiang kied koe krax pa saikrhawm mai nawh haok daux lawg pa koe piang guh veng ka see daux diang siviex mai yiem ah nin, “Kawn simex aux Abasalom eue, kawm simex, kawm simex aux Abasalom eue, aux ang khaw ti yum tang maix lie, kawm simex aux Abasalom, kawm simex aux eue mai nawh yiem sigrien sigre tan heue.”

19 Davit Deeh Hoek Yerusalim

Kix deeh kraik grawng an ka Yuabax ah nin, “Jhak heue, simiang hoik kied yiemdoe mai hoik kied khurphawm son Abasalom.” ² Mawh kheu nan, grawng pa pex kix naing daux singaix an, hoik deeh tieh ti mawh pa khurphawm ka son pui khawmuik, mawh kheu pui hoik mhong grawng kied lauxrhawm simiang son kawm simex tix daux singaix an. ³ Daux singaix an pui khankix briex mox ti ing daux veng awm pui pa koe krax kaig tua pa hoik mox tix to khaing daux biang naing. ⁴ Simiang hoik tawb ngai baoh tix mai riag yo ti yiem lox kied ting sigrien sigre, “Kawn simex aux Abasalom eue, Abasalom eue, kawm simex aux eue.” ⁵ Yuabax laig ka daux nyiex simiang ah nin, “Ka daux in singaix maix hoik kieh siliextix khankix pa hoik taoh ju maix mai ju kawm simex kawm sibun maix mai khawm ju moeng maix mai moeng iak maix khankix kaig tua, ⁶ maix kawm ca moh ka pui pa koeng ka tix mai deeh tieh tix koeng ka pui pa moh ka tix khankix, mawh kheu maix hoik kraik pao grawng ang maix lai keud son grawng cao kaing naing mai son siliextix daux singaix, aux hoik tawng grawng ceu in phao, phan Abasalom kawm im ju mai phan yix hoik mawh pa yum khawmuik daux in singaix, grawng ceu an tak sang mawh pa kieh maix nyawm rhawm kah. ⁷ Mawh kheu nan, yam in yaog ti kaoh mai hu tawx lox nyawm rhawm ka siliextix maix khankix liak, mawh kheu aux hoik tiextu ka Simiang Siviex, phan maix ang hu, pui tix kaux kawx tak ang lai ot tau mai maix sawm in, “An tak nielheu mawh pa caox ka son maix khaing can pa caoxcaig pa hoik sax yaox maix ti kham jah tom yam awn ju maix tom hoek yam in.” ⁸ Khaix an, simiang yaog ti kaoh mai ngawm ka diang siviex veng, yam

mhong kix grawng ngawm simiang ka diang siviex veng tan, mawh kheu pui khankix hoek ka plak sivoie simiang khawmuik mai pui Isarelix hoik tang to ti hu ka nyiex tix kukaux.

Davit Deeh Ing Ka Veng Yerusalieim

⁹ Ka dauw cub doeh pui Isarelix hoik thungthiang paow ti ah nin, “Simiang hoik taoh ex khaing dauw tawm taix pui koeng ex mai hoik kieh ex lawdluan khaing dauw tawm taix pui Philitix khankix mai yam in nawh hoik deeh yaow ti to khaing dauw haktiex tix jao Abasalom. ¹⁰ Abasalom pa hoik groi ex bee mai pa hoik yaow ex nawh mawh simiang piang tix, hoik yum ka dauw naing, yuh ka mawx pex lai ang kraik grawng pa sang deeh viex ex simiang ing lie?” ¹¹ Simiang Davit ploik pui hu ah nin ka cao giex kaing li Zadok mai Abiatha, “Pax kraik ka kuad song pui Yudax ah nin, yuh ka mawx pex lai tok bawgyam sonsang deeh viex simiang ing ka nyiex cao nawh lie? Lox kraik pui Isarelix khankix hoek bleeh ka simiang khawm ka nyiex haw nawh. ¹² Pex mawh puxaik aux, mawh si-ang aux mai nexnham aux, yuh ka mawx pex lai kawn ca tok bawgyam sonsang deeh viex simiang ing lie? ¹³ Kiex ah nin ka Amasa, “Ang maix mawh si-ang aux mai nexnham aux lie? Phan maix ang yaow ti mawh cao kaing naing ting pa plud Yuabax dauw cub krunaing aux ka plak sivoie aux, kieh Siyiex yuh ceu pa nielheu khaing an piang aux.” ¹⁴ Mawh kheu nan, Davit hoik kieh pui Yudax khawmuik khawrhawm awm rhawm pui tix kaux, kix ploik pui hu kraik lox in ka simiang, “Sonsang deeh ing maix mai khawm siliex maix khawmuik.” ¹⁵ Mawh kheu nan, simiang deeh ing mai hoek ka rawm klawng Yawdan mai pui Yudax hoek ka veng Gilagalax sonsang rieb simiang mai viex nawh tiang rawm klawng Yawdan. ¹⁶ Mai Shimi kawn simex Gerax pui Benyamin pa kaoh khaing veng Bihurim niied ti lih hoek tau mai pui Yudax sonsang rieb ka simiang Davit. ¹⁷ Pui Benyamin khankix hoek tau mai nawh tixheng kaux, khawm Zibax siliex dauw nyiexma Sawlux mai khawm kawn simex dauw kao phuan kaux, khawm siliex nawh khankix tixnga kaux, hoektau mai

19:16 2Sa 16:5-13. **19:24** 2Sa 9:1-13, 16:1-4.

nawh, yam an kix tiang ti hu ka plak toi rawm klawng Yawdan sivoie simiang. ¹⁸ Kix vai reu tiang ti hu sonsang tang kix cub kawn nyiexma simiang khankix hoek mai sonsang priexrien ka kix mhawm mhawm. Shimi kawn simex Gerax hoek gruxngawng tix ka plak sivoie simiang yam tiang nawh rawm klawng Yawdan. ¹⁹ Nawh ah nin ka simiang, “Paw nyang kieh simiang aux deuh phimap ka aux liak mai paw lai keud ka grawng pa ludloe siliex maix ka dauw singaix, yam lih hu cao simiang aux khaing dauw veng Yerusalieim mai paw lai een grawng ceu an dauw rhawm tix. ²⁰ Aux pa mawh siliex maix hoik tawng ka hoik yuh tix phimap, jhak heue, aux mawh pa hoek sivoie paow tix ka dauw in singaix khaing dauw paow nyiex pui Yosiep, sonsang hoek rieb ka simiang aux.” ²¹ Yam an Abishie kawn simex Zeruya deeh pawk ah nin, “Shimi caw tix yum kheu jao hoik jhaxlawg nawh ka simiang pa hoik groi Simiang Siyiex bee ang mawh lie?” ²² Davit deeh ah nin, “Kawn simex Zeruya khankiex eue, aux hoik yuh ceu patix ka pax sonsang deeh mawh pax pui koeng ka aux dauw in singaix lie? Mawh sang yaow pui Isarelix ti yum tix kaux kaux dauw in singaix lie? Mawh ang aux tawng hoik mawh tix simiang piang pui Isarelix dauw in singaix lie?” ²³ Simiang deeh ah nin ka Shimi, “Maix tak ang pon ti yum,” mai simiang hoik tiextu tix kanawh.

Davit Mai Mephibawshiet

²⁴ Mephibawshiet kawn sawlux hoek ti rieb ka simiang, nawh ang khoeuk caong tix, ang khlaow hauk jheeh tix mai ang sidaux kraung ceep tix, jah singaix lih hu simiang tom singaix deeh hoek simiang ka dauw krax pa nhim. ²⁵ Yam hoek rieb Mephibawshiet ka simiang dauw veng Yerusalieim, simiang chawk ka nawh ah nin, “Kheu jao patix maix ang hu tau mai aux?” ²⁶ Nawh deeh pawk ah nin, “Cao simiang aux eue, aux mawh pa laux caong, aux keud sang sau an brugson tix mai hawt khaix simiang, siliex aux hoik pielhen ka aux. ²⁷ Nawh hoik coh lox ka cao simiang grawng siliex maix, viang mawh nan, simiang aux mawh pa awm siliex Siyiex, mawh kheu nan yuh awm pa koe rhawm maix. ²⁸ Mawh kheu paow nyiex

keeing aux khankix hoik mawh pa keung ti yum ka plak sivoe cao simiang aux, viang mawh nan maix hoik deuh siliex maix ka daux sinax can pui pa ih priex piang pheem sawm maix, aux kawn sang koe akhuang tix baox rawg ceu patix ka daux pa yiem tix sivoe simiang lie?" ²⁹ Simiang deeh ah nin ka nawh, "Maix deeh baox kraik grawng tix yuh ka mawx? Aux hoik tat ah nin, maix mai Zibax tak goih ti cie haktiex." ³⁰ Khaix an, Mephibawshiet deeh ah nin ka simiang, "Kieh nawh teei ti cie ankix khawmuik, kheu hoik deeh hoek cao simiang aux ka daux krax pa nhimrhawm ka nyiexma tix."

Davit Cauxrhawm Ka Bazilie

³¹ Mai Bazilie pui haktiex Gilat lih hoek khaing veng Rawgelim sonsang tawx nawh simiang tiang rawm klawng Yawdan. ³² Bazilie mawh pui pa kied kuad tix kaux mai ju nawh koe tixdaix num, nawh hoik yuh ti tawx pa ih ka simiang glang yam ot nawh ka daux veng Mahanem, kheu mawh nawh pui pa kied mi. ³³ Simiang ah nin ka Bazilie, "Tiang ti hu tau mai aux, aux tak khrierien pa ih ka son maix glang yam kawn ot maix ka daux veng Yerusaliem tau mai aux heue." ³⁴ Viang mawh nan, Bazilie hoik deeh ah nin ka simiang, "Aux tak sang kawn im ju miexgrheeng sonsang khaw aux ti hu tau mai simiang ka veng Yerusaliem lie? ³⁵ Ju aux hoik koe tixdaix num daux in singaix heue. Mawh kawn sang chix goih aux ti tawng ka ceu pa mhawm mai ceu pa caox lie? Mawh kawn sang pon cim siliex maix ka ceu pa ih tix khankix mai khawm ceu pa nyaux tix khankix lie? Mawh kawn sang chix mhong aux lox lairhax pa ah cub simex mai sibun khankix rheeng miexgrheeng lie? Khaix an, aux tak sang kieh siliex maix khankix deeh koe beeh glawm pa cijen tix ceu tom rheeng bawgyam ka son simiang aux yuh ka mawx lie? ³⁶ Siliex maix tak sang tiang ti hu ka plak toi rawm klawng Yawdan tau mai simiang ceex ngie khaing mai simiang chix sang deeh tawx totaix ceu in ka aux yuh ka mawx lie? ³⁷ Yuh buanson deeh kieh siliex maix ing sonsang pon aux ti deeh ing yum ka daux veng 19:31 2Sa 17:27-29.

tokaux tix mai deeh kieh aux mawh pa sipaung tokaux yum tix hawt simeeig keeing aux khankix heue. Viang mawh nan, jhak heue, yam in siliex maix Khimaham, kieh nawhtiang ti hu tau mai simiang aux mai yuh ti tawx pa yaox maix mawh ceu pa mhawm ka nawh liak." ³⁸ Simiang deeh pawk lox ah nin, "Khimaham tak mawh pa tiang ti hu tau mai aux mai aux tak yuh ti tawx ceu pa lo nawh khankix, awm pa yaox aux mawh pa mhawm ka son maix heue. Yam in, canceu pa hoik khioxkhaw maix ti mhaing ka aux khankix, aux tak yuh ti tawx son maix heue." ³⁹ Khaix an, pui khankix hoik tiang ti hu khawmuik ka plak toi rawm klawng Yawdan daux bawgyam an heue. Yam hoik tiang simiang ti hu ka plak toi an simiang hoik kawm ti ngheet ka Bazilie mai nawb buan ka piang nawh mai nawh deeh ing ka dee ot tix heue.

Krax Simah Son Simiang

⁴⁰ Yam in, simiang hu ka veng Gilagalax mai Khimaham hoik hawt hu tau mai nawh heue. Pui Yudax khankix khawmuik hoik hawt tawx simiang tau mai pui Isarelax khankix tix plak heue. ⁴¹ Khaix an, pui Isarelax khankix khawmuik hoek ka simiang ah nin nawh, puxaik ex pui Yudax khankix hoik briex maix hu dee singai mai hoik deeh viex simiang khawm paox nyiex maix khankix mai khawm pui Davit khankix khawmuik pa ot tau mai simiang khankix tiang toi rawm klawng Yawdan, kheu jao pa yuh ka mawx lie? ⁴² Mawh kheu nan, pui Yudax khawmuik deeh pawk lox ka pui Isarelax ah nin, "Grawh grawng nawh, simiang mawh paox nyiex pa kied dex mai yix heue. Khaix an, pex chix koe krax pa songrhawm piang kix kheu jao pa yuh ka mawx lie? Khex hoik ih yix pa ih cie simiang lie? Phan ang mawh nan, khex hoik tawx simiang totaix tix ceuceu ka yix lie?" ⁴³ Pui Isarelax deeh pawk lox ka pui Yudax ah nin, "Yix hoik koe krax pa dextauka simiang ka son, mawh kheu nan, yix hoik baox nielheu koe krax pa dex ka Davit khaing pex heue. Kheu pex hoik yuh ti koe lox pa sibriem piang yix mai ang hoik mawh yix pa jah ti tawx krax keud krax gau sonsang deeh viex yix simiang ing

lie?" Viang mawh nan, lox pa ah pui Yudax khankix hoik nie riex khaing lox pa ah pui Isarelax khankix heue.

20 *Shebax Deeh Tiehfeen*

Krax tiehfeen khankix hoik lih ti koe tan mai ceukaux pui pa tiehfeen an, hoik mawh Shebax pa mawh kawn simex Bikharix mai pa mawh ceu pui Benyamin tix kaux heue. Nawh phlu teettawng ah nin, "Ceu pui Isarelax khankix eue, ex ang koe nyum pa sang pon tix ceu kawx khaing Davit mai ex ang koe sinngao pa sang pon tix khaing ka dauw kawn simex Yesie," mawh kheu nan, pui Isarelax kukaux tang deeh ing ka nyiex tix heue. ² Mawh kheu nan, pui Isarelax khankix kukaux hoik prah ka Davit mai kix deeh hawt hu khaix Shebax pa mawh kawn simex Bikharix, viang mawh nan, jah khaing hawt rawm klawng Yawdan tom hoek ka veng Yerusaliem, pui Yudax khankix kawn hawt ti ot ka dauw krax pa kaux sijax tix tau mai simiang kix. ³ Yam in, Davit hoik hoek ka nyiex tix ka dauw veng Yerusaliem tan mai simiang hoik teei sibun an khankix kao kaux pa mawh moeng iak nawh, pa hoik prah nawh kix priexrien ka nyiex haw, pa hoik laung ti deuh kix ka dauw lawg nyiex haw mai tawx pa ih ka kix, viang mawh nan, nawh ang sax dexdawd mai kix heue. Mawh kheu nan, kix hoik mawh pa laung tix ka dauw kawg awm miexmai tom hoek bawgyam singaix yum kix heue. ⁴ Khaix an, simiang ah nin ka Amasa, "Kraixkhrawm ti priex pui Yudax khankix ka son aux, dauw loe ngaix in mai deeh hoektin khawm tokaux maix heue." ⁵ Mawh kheu nan, Amasa hoik lih hu ti kraixkhrawm pui Yudax khankix, viang mawh nan, nawh hoik nielheu tok bawgyam khaing krax pa hoik tat Davit ti deuh ka son nawh. ⁶ Davit baox deeh ah nin ka Abishie, "Yam in, Shebax pa mawh kawn simex Bikharix tak yuh krax pa kharhawm ka ex mai an tak mawh pa nielheu khaing krax pa yuh Abasalom piang ex heue. Kok siliex mau soi simiang maix khankix mai niied ti hawt khaix nawh, phan ang mawh nan, lhat nawh yaox veng pa

20:1 1Sim 12:16, 2Been 10:16. 20:3 2Sa 16:22.

kauxcong khankix son tokaux nawh mai nawh tak pon ti lawdluan ti klawd khaing dauw tawm taix ex." ⁷ Mawh kheu nan, cub pui Yuabax khankix tau mai cub pui Kheretix mai khawm cub pui Peletix mai khawm cub pui pa kied ting riang rao an khankix hoik lih hu ti hawt khaix nawh khawmuik mai kix hoik lih hu khaing veng Yerusaliem sonsang hawt pheet tix ka Shebax pa mawh kawn simex Bikharix. ⁸ Yam hoik hoek kix ka rang ting pa koe ka dauw veng Gibon, Amasa hoik pon ti hoek sivoe kix tan. Yam in, Yuabax hoik ceep kraung naing tix mai nawh baox deeh rawd maox nyoi tix nyaing ka piang an tau mai vaid tix kre pa koe tau mai phak vaid tix, an mawh pa hoik phiawk nawh ti deuh ka nyoi tix mai yam lih hu nawh vaid an hoik cod. ⁹ Khaix an, Yuabax deeh ah nin ka Amasa, "Pux aux eue, mawh nyawm ot maix lie?" Yuabax jhawp ka hauk jheeh Amasa ka taix khawn dawm tix sonsang ngheet tix ka nawh. ¹⁰ Viang mawh nan, Amasa ang tawng tix rien tix ka vaid pa koe ka dauw taix khawn goix Yuabax yam an mai nawh suat tu Amasa ka vaid an mai kraung vaid nawh khankix hoik lhua ti lih piang tiex, nawh ang lai baox suat kawx, Amasa hoik yum tan heue. Khaix an, Yuabax mai pux nawh Abishie hoik nied ti hawt khaix Shebax pa mawh kawn simex Bikharix. ¹¹ Glang dauw bawgyam an, pui Yuabax tix kaux cung hawt dex Amasa ah nin, "Can pui pa koe rhawm ka Yuabax mai can pui pa koe rhawm ka Davit khankix, kieh nawh hawt ti hu khaix Yuabax heue." ¹² Viang mawh nan, Amasa hoik lulieh ka dauw nham tix piang sigreung krax ting mai yam hoik yaox kaw an ka hoik cung pui khankix ti ot tan khawmuik, nawh gah ti tik tokaux yum Amasa khaing dauw sigreung krax mai hu tik nawh ka dauw kaung mai kheem kraung ceep tix pheem piang tokaux yum nawh tan kheu hoik yaox nawh ka hoek pui kukaux ti cung jhak ka nawh. ¹³ Yam hoik gah kix tokaux yum khaing sigreung krax ting, pui khankix khawmuik hoik deeh lih hu ti hawt khaix Yuabax sonsang deeh pon hawt pheet kix ka Shebax pa mawh kawn simex Bikharix. ¹⁴ Yuabax hoik lailing ti hu ka sinax doeh ceu pui Isarelax

khankix khawmuik tom hoek ka veng Abilax pa koe ka daux haktiex Pietmakha mai kix deeh hoek ka dee khrawm paox tix tau mai kix deeh baoh hu hawt khaix Shebax.¹⁵ Khaix an, kix hoik hoek baoh tan mai kix hoik lailawm ka Shebax pa hoik bang ti ot daux veng Abelax, pa koe ka daux haktiex Bietmakha tan mai kix hoik kaong ti pum tiex khankix hawt praok guh veng mai pum tiex ankix hoik pon jung ti lhaong awm krax pa tiebtie son kix. Pui khankix khawmuik pa hoik ot tau mai Yuabax hoik deeh preeng ti hu hawt dex guh veng, sonsang yieh kix ti tik guh veng an khankix grhup.¹⁶ Khaix an, sibun pa koe pingnya cuyi ti kaux, hoik riagyo loxti lih khaing daux veng ah nin, “Nghiet heue, Nghiet heue, yuh buanson deeh ing ah nin ka Yuabax, hoek dex aux sonsang pon aux ti sikah tau mai nawh.”¹⁷ Yam hoik hoek Yuabax hawt dex nawh, sibun an hoik deeh ah nin, “Mawh maix Yuabax lie? Nawh deeh pawk lox ah nin, “Mawh aux heue, “Khaix an sibun an baoh deeh ah nin ka nawh, “Nghiet ka lox krai siliex sibun maix liak” mai Yuabax deeh pawk ti ah nin, “Aux nghiet yam in heue.”¹⁸ Khaix an, sibun an deeh krai lox ah nin, “Awm hoik koe lox lai been ah nin, kieh kix hu chawckheng ka daux veng Abilax, khaix an kix tak pon prawng ka kaing patix heue.¹⁹ Aux mawh pui pa viex krax pa nhim mai khawm krax pa kaux sijax ka daux ceu pui Isarelax khankix, maix sawg ti sang yuh krax lauxleeing ka veng in tix veng ka miex ceu pui Isarelax khankix tix kaux maix tak sang bleet ti ih sinngao cie Simiang Siyiex kheu jao grawng ceu patix lie?”²⁰ Mai Yuabax deeh pawk lox ah nin, “Kieh ceu inkix mawh pa singai hu khaing aux sonsang bleet aux ti ih ceu inkix mai sonsang yaox aux ti yuh krax pa lauxleeing inkix heue.”²¹ Ang mawh awm an, viang mawh nan, pui tix kaux khaing piang gawng Epharim, pa kok ceukaux mawh Shebax pa mawh kawn simex Bikharix hoik deeh yaog riang plawng taix tix ka simiang mai nawh hoik yuh krax pa deeh tiehfeen ka Davit, ap ti tawx ngie nawh ka aux mai aux tak deeh lih

21:2 Yaw 9:3-15. 21:7 1Sa 20:15-17, 2Sa 9:1-7.

hu khaing veng in.” Sibun an deeh ah nin ka Yuabax, “Pau ti jhak heue, kaing nawh tak mawh pa taing ti tawx ka maix khaing piang guh veng heue.”²² Khaix an, awm hoik koe pingnya cuyi nawh, sibun an hoik deeh hu ka cub pui hun mai kix kid ti teei kaing Shebax pa mawh kawn simex Bikharix mai taing ti tawx ka Yuabax. Khaix an, Yuabax deeh phlu teettawng mai kix deeh ing khaing veng an, pui kukaux hoik deeh ing ka nyiex tix, mawh kheu nan, Yuabax hoik deeh ing ka simiang daux veng Yerusalieem heue.

Pa Ot Greem Krax Pa Kuang Davit

(2Sam. 8:15-18; 1Ben 18:14-17)

²³ Yuabax hoik mawh cao kaing naing ting piang cub krunaing ceu pui Isarelax khawmuik, Benayax pa mawh kawn simex Yehawdax, hoik mawh cao kaing pa kuang piang ceu pui Kheretix mai khawm piang ceu pui Peletix khankix,²⁴ Adawram hoik mawh cao kaing pa kuang ti koh keen khankix, Yehawshaphat pa mawh kawn simex Ahilut, hoik mawh cao kaing pa priex carang khankix,²⁵ Shevan hoik mawh cao pa tiem lai, Zadok mai Abiatha hoik mawh cao giex kaing li²⁶ mai Irax pa mawh pui veng Ya-irax hoik mawh cao kaing pa kuang ka greem Davit heue.

21 Davit Pawk Bix Son Pui Gibeon

Sibhawm praix sidhiyet tix loe num glang yam kuang Davit ka haktiex, Davit chawck grawng ceu an ka Simiang Siyiex mai Simiang Siyiex deeh pawk ka nawh ah nin, “An hoik lih ti koe kheu jao Sawlux mai kheu jao paox nyiex pa hoik kieh nham pui jah, mawh kheu hoik pah nawh ka pui veng Gibeon khankix.”² Simiang kok ka pui veng Gibeon mai sikah tau mai kix, pui Gibeon khankix ang mawh kawn praix pui Isarelax, viang mawh nan, kix mawh cub pui pa kawn deuk khaing pui Amawrix mai pui Isarelax khankix hoik yuh sijax mukheu sonsang priexrien ka kix, viang mawh nan, Sawlux sawgti pah kix, ka daux pa koe rhawm nawh ti yuh, son pui Isarelax mai ka son pui Yudax khankix.³ Mawh kheu nan, Davit deeh ah nin ka pui Gibeon an khankix, “Aux tak yuh ceu patix ka son pex mai aux tak yaox ti yuh pa khioxkhaw phimap ceu patix sonsang pon

pex ti deeh nawb buan piang sinngao cie Simiang Siyiex.⁴ Pui Gibeon khankix deeh ah nin ka nawh, "Yix ang mhaing mau angah, khri angah, khaing sinngao paox nyiex Sawlux khankix, maix tak ang pon ti pah pui tix kaux kawx khaing daux pui Isarela x khankix ka son yix."⁵ Kix deeh pawk ah nin ka simiang, "Pui pa hoik yuh krax lauxleeing piang yix mai pa hoik yuh krax pa kharhawm piang yix, son ang yix lai yaox ti ot daux haktiex kuang pui Isarela x tix dah kawx, ⁶ kieh maix ap doehru nawh pa mawh kawn simex aliah kaux ka yix liak, yix tak sang takteue kix yum plak sivo e Simiang Siyiex daux veng Gebia pa mawh veng ot Sawlux pa hoik laug Simiang Siyiex ti deuh " mai simiang deeh an nin, "Aux tak tawx kix."⁷ Viang mawh nan, simiang hoik kieh Mephibawshiet, kawn simex Yawnasan kawn saux Sawlux klawd ju, mawh kheu Davit mai Yawnasan hoik yuh krax tiextu sivo e Simiang Siyiex. ⁸ Mawh kheu nan, simiang tawx kawn simex Rizapa kawn saux IE-a pa kaux Amawnix mai Mephibawshiet pa hoik keh ka son Sawlux mai khaing kawn sibun Sawlux Mikhalax pa mawh kawn saux Bazilie pui Mehawlati kawn Adarilax phuan kaux, ⁹ nawh ap kix daux tawm taix pui Gibeon mai kix takteue kix yum plak sivo e Simiang Siyiex piang gawng, mawh kheu nan, kix hoik yum khawm aliah kaux tau tan daux tix ngaix khaing bawgyam jah kix ti vawg nghox. ¹⁰ Rizapa kawn sibun IE-a teei chee rhix tawm ka son tix piang rang jah yam vawg kix nghox tom bawgyam lih lhiex, ponngaix nawh ang kieh sim pon tum piang tokaux yum mai ponsawm ang kieh totiag khankix pon hoek ti ih. ¹¹ Kix hu kra i grawng ceu pa hoik yuh Rizapa kawn sibun IE-a moeng iak Sawlux ka Davit. ¹² Pui Philitix pah Sawlux piang gawng Gilabaw mai takteue tokaux nawh mai kawn simex nawh Yawnasan piang krax Bietschan, yam an pui veng Yabesha haktiex Gilat briex ti teei tokaux yum kiex hu mai Davit teei si- ang Sawlux mai si-ang kawn simex nawh **21:7** 1Sa 20:15-17, 2Sa 9:1-7. **21:8** 1Sa 18:19. **21:12** 1Sa 31:8-13.

Yawnasan khaing tan. ¹³ Mawh kheu nan, nawh deeh viex si-ang Sawlux mai si-ang kawn simex nawh Yawnasan hoek khaing tan mai deeh khrawm si-ang pui aliah kaux an pa hoik takteue kix yum khawmuik. ¹⁴ Kix sipaung si-ang Sawlux mai kawn simex nawh Yawnasan daux haktiex Benyamin ka daux yaong Zelax ka daux simeeig keeing kix Kisha, mawh kheunan, kix hoik yuh canceu pa hoik tawm simiang ka kix khawmuik, khaix an Siyiex deeh nghiet ka lox rawg kix buan son haktiex an heue.

Pui Philitix Lauxleeing

¹⁵ Pui Philitix yuh naing tau mai pui Isarela x, Davit mai siliex nawh khankix lih ti hu puing ka pui Philitix, Davit hoik kied taug mao. ¹⁶ Yam an Ishabibenok doeh kawn praix pui pa ting kaux hak koe pliah tawng lheung pa ciien loe yieh shekhe mai nawh giex vaid pa khraox tix kre hoek keud ti sang pon pah Davit. ¹⁷ Yam an, Abishie kawn simex Zeruya, hoek teem Davit mai nawh mug pui Philitix an yum, khaix an pui Davit khankix hoik tiextu ka Davit ah nin, "Khaix singaix in maix tak ang pon ti hu tau mai yix daux naing tix bawg kawx, ex lhat pa riieng pui Isarela x khankix yeet."

Pui Davit (1Been 20:4-8)

¹⁸ Khaix an, naing lih ti koe tix bawg ka pui Philitix ka daux veng Gawbax, khaix an Sibekhie pui Hushatix pah ka Sapha doeh kawn praix pui pa ting kaux hak tix kaux. ¹⁹ Naing ba ox lih koe ka daux veng Gawbax tau mai pui Philitix tix bawg, Elahannan kawn simex Yareawregim pui veng Bieliehiem pah ka pux Gawliyax pa kaux Lakhamix pui Gitix pa koe krong pliah ting awm blax taing. ²⁰ Khaix an, naing ba ox koe daux veng Gata, ka dee an koe pui tix kaux pa koe giien taix liah giien khawm ra plak mai pa koe giien caong liah giien khawm ra khawn, giien taix giien caong khawmuik koe tix nga pon giien, nawh mawh doeh kawn praix pui pa ting kaux hak tix kaux. ²¹ Yam sibriem nawh ka pui Isarela x, Yawnasan kawn simex Shimi puxke Davit hoik pah ka nawh. ²² Inkix pon kaux mawh pa keh khaing doeh pui pa ting kaux hak ka daux veng Gata, kix hoik goh ti

yum ka daux riang rao plawng taix Davit mai ka riang rao plawng taix siliex nawh khankix heue.

LoxRhaxDavitSonKraxTaohSiyiex

22

(Yaog 18. Title, 1-50)

Khaix an Davit yaogyaw Simiang Siyiex ka lairhax in khankix, yam hoik deeh taoh Simiang Siyiex nawh khaing daux tawm taix pui koeng khankix mai khaing daux tawm taix Sawlux. ² Nawh ah nin, "Simiang Siyiex mawh rang ting dee deuh aux rhawm tix mai mawh guh veng pa kaux pa tiebtie ka aux. ³ Simiang Siyiex mawh riang rao aux, Nawh Cao mawh pa tiebtie aux mai rung pa lawm Nawh taoh ti teei aux mai mawh tab pa kaux son aux, Maix Cao hoik taoh aux khaing daux pa kharhawm. ⁴ Aux tak kok yo ka Simiang Siyiex pa khaw aux ti yaogyaw ka Nawh, mawh kheu hoik taoh Nawh aux luan khaing daux tawm taix pui koeng aux khankix. ⁵ Maox kraxyum hoik rob vungviang aux mai aux lhat ka rawm klawng yum pa chix kieh laux, ⁶ maox meung yum hoik rob vungviang aux mai aux hoik krix ka kie krax yum, ⁷ yamyaox aux kraxnu krax khawm aux kokyo ka Simiang Siyiex mai aux rawg mhaing ka Nawh mai Nawh mhong ka lox pa kokyo aux ka daux nyiex buan Nawh mai lox pa kokyo aux sivoie ngai Nawh hoek daux yhaok Nawh Cao. ⁸ Yam an haktiex yungyang mai riah raoma hoik gah tix, mawh kheu kied songrhawm Nawh Cao. ⁹ Taox nau lih khaing daux meeh Nawh mai ngu lih khaing daux jheeh Nawh mai gaox ngu rup kheu Nawh. ¹⁰ Nawh Cao plak raoma lih hoek ka greem caong Nawh mai lih timawh pa faik. ¹¹ Nawh Cao brug ka siliex Siyiex Cherubin hoek mai po hu vungviang mai sidawng piang prui bhaung. ¹² Nawh yuh pa faik mai mox ka daux rawm mai paiawm pa pu rob vungviang Nawh. ¹³ Mawh kheu jhan pa rieng sivoie ngai Nawh, gaoxngu hoik rup kah. ¹⁴ Siyiex pa ting lhaong, kieh sinum praix lih piang raoma mai ploi lox sinum lih mawh mu pre mai gaoxngu. ¹⁵ Nawh puing ak hu ka kix mai ploi plukplak praix mai kieh kix som mai tang to. ¹⁶ Siyiex eue, Maix deuh phimap ka kix ka daux pa toek Maix bhawm ka 22:34 Ha 3:19. 22:50 Ro 15:9.

daux meeh Tix mai kieh greem rawm mai jaong num haktiex pruh. ¹⁷ Nawh Cao ot dee lhaong mai nyeu taix Tix tok aux lih ka daux rawm pa ting pa raux ¹⁸ mai taoh ti teei aux lih khaing pui pa koeng ka aux pa nielheu ting riang khaing aux mai pa koengriang ciangkhoi ka aux khankix, mawh kheu ang aux lai pex ka kix. ¹⁹ Kix hoek ti yuh pa caox ka aux mai singaix yam yaox aux krax khirhawm, viang mawh nan, Simiang Siyiex mawh dee deuh aux rhawm tix. ²⁰ Nawh thong aux hu ka dee viehva mai Nawh taoh aux kheu moh Nawh aux. ²¹ Simiang Siyiex tawx buanson awm pa rahsee aux mai awm taix pa singax singeh aux. ²² Grawh grawng nawh kheu hawt aux daux krax Simiang Siyiex jheengjheeng mai ang yuh pa caoxcaig mai ang tik ka Siyiex. ²³ Krax prawngca Nawh, hoik koe sivoie ngai aux mai aux ang tik ka lox tat jhawm prawng Nawh Cao. ²⁴ Aux hoik rahsee sivoie ngai Nawh mai aux hoik viex ka phimap pa caox. ²⁵ Grawh grawng nawh Siyiex tawx buanson awm pa rahsee aux mai awm taix pa singax singeh plak sivoie ngai Nawh Cao. ²⁶ Tawx pa cauxrhawm ka pui pa cauxrhawm, Maix tawx krax rahsee ka pui pa rahsee. ²⁷ Mai tawx pa singax singeh ka pui pa singax singeh mai Maix tawx rhawm pa tiehfeen ka pui pa tiehfeen. ²⁸ Maix taoh ti teei ka pui pa hot pa sibhawm khankix mai yeen ka pui pa ting rhawm lhaong ngai khankix. ²⁹ Simiang Siyiex mawh kawkgu aux mai jhan rieng ka daux pa faik aux. ³⁰ Grawh grawng nawh, aux to dex tab Maix mai pon jao ka guh veng, mawh kheu deuh aux rhawm tix ka Maix. ³¹ Daux krax Siyiex, mawh pa grumnaog mai sijax mukheu Simiang Siyiex mawh pa hoik ciied tix singax kauxcong jheengjheeng mai pa kaux sijax Nawh Cao mawh ceu pa tieb ka kix pui pa deuh rhawm ka Nawh. ³² Lheu khaing Siyiex, Siyiex mawx pa kawng koe tix kaux kaux, lheu khaing Siyiex ex, simaox rang mawx pa kawng ting khaing Nawh lie? ³³ Siyiex teei maox rawd nyoi mai nhawt ka nyoi aux mai kieh krax hu aux rahsee. ³⁴ Nawh kieh caong aux phai hu awm caong cak mai kieh aux cung ka dee lhaong aux. ³⁵ Nawh gau taix aux sonsang chix puing naing mai plawng

taix aux pon raig ti tik ka ak tawng lheung.³⁶ Nawh tawx ceu pa tiebtie pa taoh ka aux mai taix khawn dawm Nawh johjhan ka aux, Nawh yaog aux ting ka daux krax gunyeung pa cauxrhawm Nawh.³⁷ Nawh Cao kieh krax hu aux blang, son ang caong aux cang klad.³⁸ Aux pheet ka pui pa koeng ka aux tom krup mai phan aux ang nyang yuh kix lauxlak pakleeing ang aux deeh hoek.³⁹ Aux dig kix goh greem caong tix tom ang kix lai pon kaoh.⁴⁰ Grawh grawng nawh, Maix nhawt maox rawd nyoi aux, sonsang koe riang tix puing naing ka kix pa ot tang plak goh greem caong aux.⁴¹ Maix hoik kieh pui pa koeng ka aux khankix to plak khaix aux mai aux sang yuh lauxleeing ka pui koeng ka aux paklawg.⁴² Kix riagyo miexding kawx ang koe pui pa taoh, kix kokyo Simiang Siyiex kawx Nawh Cao ang pawk.⁴³ Yam an, aux krid kix phawng awm phawng tiex pa phlu bhaung mai klup ti tik kix daux krax awm nyheenyhawk.⁴⁴ Maix kieh aux luan khaing pui pa lahcha ka aux maix kieh aux mawh simiang cao pa giex kaing piang pui tang ceu, pui pa ang aux tawng khankix mawh siliex aux.⁴⁵ Yam mhong kix lox aux, nghiet lox aux dommawx doman, pui tang ceu khioxkhaw ka aux.⁴⁶ Kix khleep ngai mai lih khawm siyaung tix khaing daux tab dee mox kix tix,⁴⁷ Siyiex mawh cao pa im ju mai rang ting aux, kieh koe buanson liak, kieh yaog ka Cao prawngca plak aux, kieh cub pui khankix Siyiex Cao taoh aux ting lhaong liak.⁴⁸ Siyiex ot ka greem aux⁴⁹ mai Maix kieh aux luan khaing daux tawm taix pui pa koeng ka aux mai yaog aux ting lhaong piang pui pa ot tang plak mai kieh aux luan khaing daux tawm taix pui pa tudrhim khankix.⁵⁰ Mawh kheu nan, Simiang Siyiex eue, aux tak sang yaogyaw ka Maix mai aux tak sang rhax lai yaogyaw ka ceukaux Maix.⁵¹ Nawh Cao hoik tawx krax taoh pa ting lhaong ka simiang pa laug Nawh mai Nawh Cao hoik yuh buanson jah ka Davit kaw pa hoik groi Nawh bee mai doehru nawh leeingju heue."

23 *Lox Ghoik Davit Ti Krai*

Inkix mawh lox pa ghoik Davit tix kra. Davit kawm simex Yesie ah nin, "Pui pa

hoik yaog Siyiex Yakop ting lhaong mai pa hoik groi bee kah mai nawh mawh pui pa thut lox rhax yaogyaw pa jiet mhawm son pui Isarelax,² Khuan Simiang Siyiex ah nin ka aux mai gumlox Nawh Cao hoik koe piang dak aux.³ Siyiex pui Isarelax ah nin, rang ting pui Isarelax ah nin ka aux, pui pa kuang piang pui khankix, tak mawh pa kuang ka daux pa rahsee Nawh Cao⁴ mai tak kuang ka daux krax pa lhatgraung ka Siyiex, nawh tak awm pa riiengyam lih singaix plak ponngawb, pa ang paiawm ceep kah mai nawh tak awm rib awn pa kuah khaing daux tiex pa jhan singaix khaix hoik lih lhiex.⁵ Ru aux hoik mawh pa kauxcong tau mai Siyiex ang mawh lie? Mawh kheu nan, Nawh Cao hoik yuh gumlox sijax mukheu leeingju tau mai aux, viang sijax mukheu an ang nyang bax gurmnaog kawx, mawh krax pa taoh ka aux khawmuik mai mawh krax pa fahrhawm aux kah.⁶ Viang mawh nan, can pui pa ang rahsee khankix, tak awm kat lawm pa tikvud kah, mawh kheu pui ang pon teeh ka taix tix.⁷ Phan pui sang teeh ka pui an, nawh tak ceep ka kraung naing rhiem mai giex ka pliah mai tak gleeing kix khawmuik ka daux ngu."

Pui Davit Ting Riang Rao (1Beeen 11:10-47)

⁸ Inkix mawh cub pui pa ting riang rao cie Davit, Yawsheba, Basahibiet pui Takhawmoni, mawh cao kaing naing ting piang cub cao kaing naing loe kaux, ceukaux nawh mawh Adinaw pui Ezanix, kheu hoik pon pah nawh pui yum daix yieh kaux tix domneh.⁹ Khaix nawh mawh Eliaza kawn simex Dodo kawn saux Ahawhix, nawh mawh pui pa ting riang rao tix kaux ka daux cub kix loe kaux tix kaux pa ot tau mai Davit, yam tieh kix ka pui Philitix pa khrawm paox tix, sonsang yuh naing, khaix an pui Isarelax deeh gah tix khaing tan.¹⁰ Nawh yaog ti kaoh puing ka pui Philitix khankix tom hoik saux meue taix tix mai ang lai pon yah taix tix khaing void, Simiang Siyiex hoik kieh kix koe krax pex pa kied ting daux singaix an mai pui khankix deeh hawt khaix nawh sonsang tudrhim ngie kraung cie pui koeng.¹¹ Khaix nawh mawh Shama kawn simex Agix pui Hararix, pui Philitix khankix khrawm paox ka dahdee tix

dah, ka dee hoik sum kix nghox mai sivawng khankix, pui Isarelix hoik to khaing pui Philitix. ¹²Viang mawh nan, Shama hoik cung ka dee an mai tiebtie ka pui Philitix mai pah pui Philitix khankix, yam an Simiang Siyie x hoik tawx krax pex pa kied ting ka nawh. ¹³Yam vawng nghox, pui loe kaux khaing dau cub cao kaing ting an khankix tixngoe kaux lih hu ka Davit ka dau rang Adulam, cub pui naing Philitix khankix peung ka dau ngawd Rephem. ¹⁴Yam an, Davit hoik ot ka dau tab dee pa kauxcong tix mai cub pui naing Philitix khankix ot ka dau veng Bieliehiem. ¹⁵Davit ah nin, "Aux kied sang nyaux nie rawm, pui mawx tix kaux kaux pa sang hu kin khaing dau rawm dau veng Bieliehiem pa koe hawt dau diang siviex veng an mai tawx aux nyaux kah." ¹⁶Pui kua pui vao loe kaux, preeng ti laig ka dau sinax dee bang pui Philitix mai kin rawm khaing dau rawm dau veng Bieliehiem pa koe hawt diang siviex veng mai viex hoek ka Davit, viang yuh ka mawx kawx, nawh ang nyaux, nawh see rawm an ka plak sivo e Simiang Siyie x. ¹⁷Nawh ah nin, "Simiang Siyie x eue, kieh in mawh pa singai khaing aux, phan aux nyaux ka rawm in, awm nyaux aux ka nham pui pa ang lai lhaw k ka ju tix mai hu kin kah." Mawh kheu nan, nawh ang nyaux rawm an, grawng ceu in mawh pa yuh pui kua pui vao ankix loe kaux. ¹⁸Abishie pux Yuabax kaw n simex Zeruya, yaox ti mawh cao kaing ting ka dau pui an khankix loe kaux, nawh teei pliah tix mai yuh ka pui loe yieh kaux mai pon pah kix yum khawmuik, nawh hoik pon pa ao min ka sinax pui loe kaux in. ¹⁹Ang hoik mawh nawh pa kied koe min khaing ka dau sinax kix loe kaux lie? Mawh kheu nan, nawh pon ti mawh cao kaing naing ting tix kaux piang kix, viang mawh nan, nawh ang nyang krup diang pui an sivo e loe kaux. ²⁰Beneyax kaw n simex Yehoyadax mawh pui pa koe rhawm vao tix kaux khaing veng Kazelax mai pa hoik yuh kaing pa ting lhaong, nawh hoik pah pui Mawbax ra kaux pa kied koe rhawm vao awm sivai sangsi, nawh ba ox deeh hu tangdah mai hoik pon pah sivai sangsi tix mu ka dau x o,

bawgyam lih rawm ciex. ²¹Nawh pah pui Ejiptux pa ting lhaong tix kaux khaing pui khankix, pui Ejiptux an giex pliah tix mu ka dau taix tix, viang mawh nan, Beneyax lih hu ka nawh tau mai khaox grix mai nawh pon rhim pliah khaing dau taix pui Ejiptux mai deeh pah pui an yum ka pliah cie nawh. ²²Khaix hoik yuh Beneyax kaw n simex Yehoyadax ka ceu ankix, nawh hoik ao min ka dau sinax pui ting riang rao an loe kaux. ²³Nawh nielheu koe min khaing cub pui an tixngoe kaux, viang mawh nan, nawh ang krup diang pui ankix sivo e loe kaux, Davit yaog nawh mawh cao kaing piang cao pa pau ju tix. ²⁴Asahelax pux Yuabax mawh ka dau cub pui ankix tixngoe kaux tix kaux, Elahanan mawh kaw n simex Dodo khaing veng Bieliehiem, ²⁵Shama pui Harawdi mai Elika pui Harawdi, ²⁶Heleza mawh pui Palatix mai Irax kaw n simex Ikesha mawh pui Tekaw, ²⁷Abeza mawh pui Anatawtix mai Mebunie mawh pui Hushatix, ²⁸Zalomon mawh pui Ahawhix mai Maharie mawh pui Netawphatix, ²⁹Heliep mawh kaw n simex Banax pui Netawphatix mai Itie kaw n simex Ribie khaing veng Gibia pui Benyamin, ³⁰Beneyax pui Piratawni mai Hidae pa ot dau klawng Gasha, ³¹Abilabon pui Arabat mai Azamaviet pui Bahumix, ³²Eliabax pui Shalabawnix mai khaing cub kaw n simex Yashin pa mawh Yawnasan, ³³Shama pui Hararix mai Ahiam kaw n simex Shara pui Hararix, ³⁴Elipheliet kaw n simex Ahasabie pui Makhatix mai Eliam kaw n simex Ahitawphelax pui Gilawnix, ³⁵Hezarie pui Kharamelax mai Parie pui Arabix, ³⁶Igalax kaw n simex Natan pui Zawbax mai Banix pui Gat, ³⁷Zelex pui Amon mai Naharie pui Berawtix. Nawh mawh pa klawm kraung naing ceep Yuabax kaw n simex Zeruya. ³⁸Irax pui Itarix mai Gariet pui Itarix ³⁹mai Uriyax pui Heta khawmuik koe pui tixngoe aliah kaux heue.

Davit Koh Pui Isarelix Mai Yudax

24 *(1Been 21:1-27)*
Krax songrhawm Simiang Siyie x deeh lih piang pui Isarelix mai Nawh Cao sorhawm Davit sonsang puing ka kix ah nin ka nawh, "Lih hu heue, simin ti yaox pui Isarelix mai pui Yudax khankix." ² Simiang ah nin ka Yuabax cao kaing naing ting piang krunaing pa

ot mai nawh, “Hu ka sinax doehru pui Isarelix, jhak ka veng Dan tom hoek ka veng Berashebax, simin ti yax ka pui sonsang tawng aux ka koe pui miexding.”³ Yuabax ah nin ka simiang, “Kieh Simiang Siyiex maix baox pui tixyieh son, piang pui pa hoik koe khankix mai kieh Nawh Cao kieh simiang aux yax ceu ankix ka ngai tix, viang mawh nan, cao simiang aux lai khawrhawm ti yuh kaing ceu in jao patix?”⁴ Viang mawh nan, lox tawm simiang hoik pex piang Yuabax mai piang cao kaing naing khankix, mawh kheu nan, Yuabax mai cao kaing naing khankix lih hu plak sivoe simiang sonsang hu simin ka pui Isarelix.⁵ Kix tiang rawm klawng Yawdan mai hu bang ka veng Araw ka plak khawn dawm veng pa koe daux ngawd Gat ka see veng Yaza.⁶ Khaix an, kix deeh hoek ka haktiex Gilat mai haktiex Tathinhawdashi, kix kaoh khaing tan mai hoek ka veng Daya mai hawt vungviang veng Sidon,⁷ Kix hu bleeh ka tab pa kauxcong Turux mai ka veng pui Hiwix mai ka veng pui Khanan, khaix an kix deeh lih hu ka baoh jee haktiex Yudax tom hoek ka veng Berashabax.⁸ Khaix hoik sidah hu kix ka haktiex an, hoik koe dim khix mai tixnga ngaix, kix deeh hoek ka veng Yerusaliem.⁹ Khaix an, Yuabax tawx carang pui pa hoik koh tix ka simiang ka daux pui Isarelix pui naing pa vao pa giex vaid pliah khankix koe daix sien kaux mai pui naing pui Yudax koe phuan sien kaux heue.

Pa Prawngca Phimap Davit

¹⁰ Khaix hoik koh Davit carang pui, nawh deeh dohkeud ka krax lud tix ah nin ka Simiang Siyiex, “Can pa hoik yuh aux khankix hoik mawh phimap pa kied ting, yam in aux rawgbuan ka Maix Simiang Siyiex, rawg Maix pluatploi ka phimap siliex Maix liak, mawh kheu hoikyuh aux pacaoxcaig.”¹¹ Yam kaoh Davit khaing it tix pongawb, lox Simiang Siyiex hoek ka cao jhai Gat pa mawh pui pa grux yax ka son Davit ah nin,¹² “Hu kraik ka Davit Simiang Siyiex ah nin, Aux koe pa sang kraik ka maix loe ceu, laug ti teei tix ceuceu sonsang yuh Aux ceu an

piang maix.”¹³ Gat hoek ka Davit kraik grawng an ka nawh ah nin, “Mawh sang kieh maix krax hot sibhawm hoek piang haktiex tix lie? Phan ang mawh nan, mawh sang to maix khaing sivoe pui koeng pa pheet maix loe khix lie? Phan ang mawh nan, mawh sang kieh maix jhawm saux preng lih ka haktiex tix loe singaix lie? Yam in, keud ti yax mhawmmhawm mai deeh pawk lox pa sang caw aux ti viexing ka Nawh Cao, pa ploi aux hoek ka maix.”¹⁴ Davit pawk lox ah nin ka Gat, “Aux hoik kied tugrhawm ka tete, kieh yix hoek daux tawm taix Simiang Siyiex, mawh kheu krax cauxrhawm Nawh Cao hoik kied ting lhaong, paw doh kieh aux hoek ka daux tawm taix kawm pui liak.¹⁵ Mawh kheu nan, Simiang Siyiex ploi jhawm saux preng hoek piang pui Isarelix, jah pongawb tom hoek bawgyam pa deuh Nawh Cao, jah ka veng Dan tom hoek ka veng Berashebax, pui hoik yum aliah mheen kaux.¹⁶ Yam hoik nyeu kawncau Siyiex taix tix piang veng Yerusaliem sonsang yuh veng an lauxleeing, Simiang Siyiex deeh dohkeud ka daux rhawm tix mai Nawh Cao ah nin ka kawncau Siyiex, “Pa sang hu yuh pui lauxleeing, naox heue yoi taix Maix” mai kawncau Siyiex an ot hawt biang pah nghox Arawrax pui Yebusix.¹⁷ Yam yax Davit ka kawncau Siyiex pa lih hoek ciyang ka pui khankix, Nawh ah nin “Aux hoik yuh ceu pa caox, cub yung in khankix mawh yuh ceu patix, Aux rawgbuan ka Maix Cao kieh taix Maix hoek ngie piang aux mai ka doeh nyiexma keeing aux khankix.”

Khu Dee Tan Glah Nghox

¹⁸ Ka daux singaix an Gat deeh hoek ka Davit ah nin ka nawh, “Hu mai sum khu dee tan tix lhang son Simiang Siyiex ka glah nghox cie Arawnax pui Yebusix.”¹⁹ Davit lih hu mai yuh awm lox pa tawm Simiang Siyiex ka lox pa kraik Gat ka nawh.²⁰ Yam maong Arawnax ti jhak ka plak sivoe tix, nawh yax hoek simiang tau mai siliex tix ka plak sivoe nawh, mawh kheu nan, Arawnax lih plak praix mai gup ngai tix piang tiex sivoe simiang.²¹ Arawnax ah nin, “Mawh hoek simiang aux ka siliex tix kheu jao patix?” Davit deeh ah nin ka nawh,

“Mawh sonsang liag aux glah nghox maix, sonsang sum khu dee tan son Simiang Siyiex sonsang luan pui khankix khaing jhawm saux preng.”²² Arawnax deeh ah nin ka Davit, “Kieh simiang aux teei mai tan can pa yax maix mawh pa mhawm, jhak heue, mawie hoik koe tin sonsang yuh krax tan pa gleeing kah, koe kraung pa shiao mai iak mawie ka glah nghox sonsang yuh khix taung kah.”²³ Simiang eue, ceu inkix aux hoik ap ka maix simiang” mai Arawnax deeh ah nin ka simiang, “Kieh Simiang Siyiex maix, rieb ti

teei ka maix.”²⁴ Simiang deeh ah nin ka Arawnax, “Ang mawh nan, aux tak liag ka maix, aux ang rhawm tan krax tan pa gleeing ka Simiang Siyiex aux ka pa ang koe ngawh tix ceu kawx,” mawh kheu nan, Davit liag glah nghox an mai mawie ka mau shekhe tix phuan plah.”²⁵ Davit sum khu dee tan son Simiang Siyiex ka dee an mai tan krax tan pa gleeing mai krax tan pa nhim, Simiang Siyiex nghiet lox rawg nawh buan son haktiex an mai jhawm saux preng hoik grai khaing pui Isarelax heue.